





道光十一年春鐫

復社姓氏傳略

南陔堂藏版





復社姓氏傳略卷首

蘇州府震澤縣學生臣吳山嘉恭錄

乾隆四十一年

欽定勝朝殉節諸臣錄

御製詩有序

昨以勝國殉節之臣各能忠於所事不可令其湮沒不彰特敕大學士九卿等稽考史書核議予諡入祠以昭軫慰其建文諸臣之死事者並命甄議茲大學士等議上錄其生平大節表著者予以專諡餘則通諡爲忠烈忠節次則通諡爲烈愍節愍統計一千六百餘人若諸生韋布未通仕籍及姓名無考如山樵



市隱之流則入祀所在忠義祠統計又二千餘人各為一冊進覽之均為允協因名之曰勝朝殉節諸臣錄冠以所頒諭旨附載廷臣議疏彙刊頒行俾天下後世讀史者有所考質夫以明季死事諸臣多至如許迥非漢唐宋所可及錄而旌之亦累朝所未舉行似亦足以褒顯忠貞風勵臣節固不必如張若漑所請之徧行查訪徒滋紛擾致無了期且即再入數千人於表章大義亦無所增減廷臣駁議惟謹亦并載之爰題詩簡端用示大意

信史由來貴癉彰勝朝殉節與羶薌五常萬古既云樹潛德幽光允賴揚等度早傳遼及宋

宋李若水從欽宗至金營不屈而死金人相與言曰遼國之亡死義者十數南

朝惟李侍郎一人

後先直邁漢和唐諸臣泉壤應相慶捨死初心久乃償



復社事略

馮元颺遷蘇松兵備參議太倉人陸文聲訐其鄉官張溥張采倡復社亂天下巡按倪元珙以屬元颺元颺盛稱溥等元珙據以入告體仁庇文聲兩人並獲譴

明史馮元颺傳

庶吉士張溥知縣張采等倡爲復社與東林相應和體仁因推官周之夔及奸人陸文聲訐奏將興大獄嚴旨察治以提學御史倪元珙海道副使馮元颺不承風指皆降謫之

明史溫體仁傳

傅朝佑疏論溫體仁六大罪言體仁子見屏於復社諸生募人糾彈株連不已且七年又議裁減茂才國家三百年取士之經一旦壞於體仁之手此謂得罪於聖賢

明史傅朝佑傳



復社傳 卷首  
金毓峒言復社一案其人盡逢掖不可以一夫私怨開禍端帝採  
納 明史金毓峒傳

流寇偪皖大鉞避居南京頗招納游俠爲談兵說劍觀以邊才召  
無錫顧杲吳縣楊廷樞蕪湖沈士柱餘姚黃宗義鄞縣萬泰等皆  
復社中名士方聚講南京惡大鉞甚作畱都防亂揭逐之大鉞懼  
乃閉門謝客 明史馬士英傳

福王召泧爲少詹事安遠侯柳祚昌疏攻泧謂朝服謁潞王於京  
口自恃東林巨魁與復社楊廷樞顧杲諸奸狼狽相倚陸下定鼎  
金陵彼爲討金陵檄所云中原逐鹿南國指馬是何語乞置泧於  
理除廷樞杲名其餘徒黨容臣次第糾彈時國事方棘事亦竟寢

泧移疾歸

明史徐泧傳

烏程執政八年以禁錮東林爲事而宜興復相又思援手大鉞會  
眉生保舉入京劾武陵并及大鉞大鉞始沮喪定生與次尾因草  
畱都防亂揭顧子方爲首一時勝流咸列姓名大鉞杜門咋舌欲  
死士英定策大鉞暴起遂廣揭中姓名以造蝗蝻錄思一網殺之  
仲馭下獄死眉生次尾崑銅皆亡命余與子方從徐署丞疏逮問  
而定生亦爲校尉縛至鎮撫事雖解已濱十死矣若是乎宏光南  
渡止結得畱都防亂揭一案也 黃宗義陳定生墓誌

蠅蚋錄出於溫體仁蝗蝻錄出於阮大鉞又有續蠅蚋錄或曰續  
蠅蚋錄及蝗蝻錄乃復社諸君子也計二千二百五十五人惟兩



陝滇中無人

東林列傳

熊開元爲吳江令肇舉復社邑中諸生吳翮等與吳郡楊廷樞顧夢麟暨二張共成之

明文英華

太倉張溥張采結應社松江陳子龍結幾社而吳江獨推重吳翮南渡阮大鍼報夙怨攻復社爲黨人國亡乃解

南疆逸史

崇禎二年己巳吳江縣知縣熊魚山以文章經術爲治知人下士慕天如名迎致邑館邑中吳氏沈氏諸子弟皆從之授學天如於是爲尹山大會茗雪之間諸名彥畢至未幾臭味翕集遠自楚之蘄黃豫之梁宋上江之宣城寧國浙東之山陰四明輪蹄日至比年而後秦晉閩廣閒多有以文郵致者是時江北匡社中州端社

松江幾社萊陽邑社浙東超社浙西莊社黃州質社與江南應社各分壇玷天如乃合諸社爲一而爲之立規條定程課曰自世教衰士子不通經術但剽耳儻目冀倖弋獲於有司登明堂不能致君長郡邑不知澤民人材日下吏治日偷皆由於此溥不度德不量力期與四方多士共興復古學將使異日者務爲有用因名曰復社又申盟詞曰毋從匪彝毋讀非聖書毋違老成人毋矜己長毋形彼短毋巧言亂政毋干進辱身嗣今以往犯者小用諫大則擯弗與約旣布天如於是裒十五國之人文而詮次之目其集曰國表受先作敘弁首

復社紀略

三年庚午鄉試諸賢與者咸集天如又爲金陵大會

同上



五年壬申天如成進士與館選給假歸葬六年癸酉春又爲虎邱大會是日山左江右晉楚閩浙以舟車至者千餘人大雄寶殿不能容生公臺千人石鱗次布席皆滿觀者無不詫歎以爲三百年來未嘗有也比別祖道百里不絕

同上

文社始天啓甲子合吳郡金沙橋李僅十有一人張溥天如張采受先楊廷樞維斗楊彝子常顧夢麟麟士朱隗雲子王啓榮惠常周銓簡臣周鍾介生吳昌時來之錢梅彥林分主五經文字之選而效奔走以襄厥事者嘉興府學生孫淳孟樸也是曰應社當其始取友尙隘而來之彥林謀推大之訖於四海於是有廣應社貴池劉城伯宗吳應箕次尾涇縣萬應隆道吉蕪湖沈士柱崑銅宣

城沈壽民眉生咸來會聲氣之孚先自應社始也崇禎之初嘉魚熊開元宰吳江進諸生而講藝於時孟樸里居結吳翻扶九吳允夏去盈沈應瑞聖符等肇舉復社於時雲間有幾社浙西有聞社江北有南社江西有則社又有歷亭席社崑陽雲簪社而吳門別有羽社匡社武林有讀書社山左有朋大社僉會於吳統合於復社復社始於戊辰成於己巳其盟書曰學不殖將落毋蹈匪彝毋讀非聖書毋違老成人毋矜厥長毋以辯言亂政毋干進喪乃身嗣今以往犯者小用諫大者擯僉曰諾是役也孟樸渡淮泗歷齊魯以達於京師賢大夫士必審擇而定矜契然後進之於社故天如之言曰忘其身惟取友是急義不辭難而千里必應三年之內



復元如傳 卷首  
若無孟樸則其道幾廢蓋先後大會者三復社之名動朝野孟樸  
勞居多然而斂怨深矣十年正月蘇州民陸文聲疏陳風俗之弊  
皆原於士子庶吉士張溥知臨川縣事張采倡立復社以亂天下  
思陵下提督學政御史倪元珙察覈倪公言諸生誦法孔子引其  
徒談經講學互相切劘文必先正品必賢良實非樹黨文聲以私  
憾妄訐宜罪閣臣以公蒙飾降光祿寺錄事蘇州推官周之夔者  
與溥同年舉進士初亦入社至是希閣臣意墨經詣闕復訐奏溥  
等樹黨挾持案久未結讒言罔極至有草檄以聲復社十罪者大  
略謂派則婁東吳下雲間學則天如維斗臥子上搖國柄下亂羣  
情行殊八俊三君迹近八關五鬼外吾黨者雖房杜不足言事業

異吾盟者雖屈宋不足言文章或呼學究智囊或號行舟太保傳  
檄則星馳電發宴會則酒池肉林所云行舟傳檄殆指孟樸言之  
至十五年御史金毓峒給事中姜埰各上疏白其事始奉旨朝廷  
不以語言文字罪人復社一案准注銷後福藩稱制阮大鍼怨戊  
寅秋南國諸生顧杲等一百四十人之具防亂公揭也日思報復  
爰有王實鼎東南利孔久湮復社渠魁聚斂一疏大鍼語馬士英  
云孔門弟子三千而維斗等聚徒至萬不反何待至欲陳兵於江  
以爲防禦心知無是事而意在盡殺復社之主盟者時崑銅暨宜  
興陳貞慧定生輩皆就逮繫獄桐城錢秉鐙宣城沈壽民亡命得  
脫假令 王師下江南少緩則復社諸君難乎免於白馬之禍矣



吳扶九居吳江之荻塘藉祖父之貲會文結客與孫孟樸最厚倡  
爲復社旣而思合天下英才之文甄綜之孟樸請行出白金二十  
鎰家穀二百斛以資孟樸閱歲羣彥胥來大會於吳郡舉凡應社  
匡社幾社聞社南社則社席社盡合於復社論其文爲國表雖太  
倉二張主之實引次尾扶九相助當其時烏程溫相君有子求入  
社扶九堅持不可於是乎有徐懷丹之檄陸文聲之疏繼以周之  
夔之彈事又繼以王實鼎之飛章而復社禍機旣發扶九亦日在  
憂患中家居論斷歷代史分爲存信存疑二部又聚明人集三千  
七百家欲輯典故成一家言皆未果遺書經盜劫散佚殆盡有子

南齡余女壻也僅存復社同人姓氏一冊出自扶九手書爰錄其  
副按籍以求諸先生之詩蓋千百之什一爾

同上

明季黨禍社事初不相蒙至於亡國之罪尤與應社復社諸君不  
相及不可不辨也社事之興不過諸生文字之會自朝宁視之無  
異童子之陳俎豆習禮儀爲嬉戲耳且明祖諸生之禁甚嚴非若  
漢唐宋之太學生得羣聚京師伏闕百十人橫議存亡大計也漢  
唐黨禍其人身爲大官仕於朝次亦爲郡國守相若二張雖仕不  
達維斗彥林終老孝廉東之婦翁吳扶九先生不惜破產以勸復  
社與子常麟士孟樸皆頽然老諸生豈漢唐宋黨人之比哉

計改  
亭集



復社姓氏傳略敘

子讀歐陽子朋黨論而慨然於君子小人之際也夫君子與君子以同道爲朋道同則心一心一則一二人不爲少千萬人不爲多歐陽子云自古爲朋之多且大莫如周而周用此以興者善人雖多而不厭也有明之季皇綱不振國是紊如吾家涇陽先生與高景逸諸公講學東林書院一時雲集影從者甚衆自是而後天下士猶能以文章氣節相劇切吳江吳扶九先生創舉復社太倉張天如復舉應社以合之於是江北之匡社中州之端社松之幾社萊之邑社浙東西之超社莊社等皆并而爲一考其實不過論文講道初無與於國家之事也而始焉溫相弄權繼焉馬阮朋比作



奸俱悉力與復社為仇幾致清流白馬之禍嗚呼明社至此而遂  
屋矣夫士子者國家之元氣也有明二百七十餘年養士之報至  
復社而會其歸一時殉難之士多出於其中非君子與君子道同  
而心一之效歟假使當時誅斥宵小收用賢良敗亡未必若彼其  
速乃計不出此而偷旦夕之安豈不謬哉扶九先生有手錄社中  
姓氏一冊凡二千二百四十人而事行未具先生五世從孫愚甫  
博考羣書羅其出處事跡仿小傳例成傳略十卷共得一千二百  
有餘人其文直其事核可謂善著書雖未及考者尚多而為力亦  
已勤矣昔子覽元祐黨籍其犖犖大賢具見史傳而無考者止識  
姓名無從得其行略心竊恨之至讀東林諸賢傳為之慊然不能

去手今復得愚甫此書益為欣快信賢者之必有後也予雖不文  
敢論其略挂名卷中以附不朽有厚幸焉是為敘  
道光十年歲在庚寅四月上澣長洲顧承撰



吳君愚甫以其五世從祖扶九先生手編復社姓氏錄重加考証博采廣摭成傳略十卷將開雕以子曾任商推之役寄書索敘子喟然歎曰從來小人之厄君子必指爲朋黨刊其姓氏欲使其世世蒙惡名也然蔡京立元祐黨人碑碑毀黨人梁燾之曾孫律沈千之曾孫暉皆重刻之龔夬之族孫頤正按羅黨人事跡各爲列傳韓侂胄立慶元黨人碑劉光祖遂以慶元黨人之名名於時而黨人之子孫亦各以其名名其門第孰知厄之適以顯之耶明季逆閹傾陷東林殆盡扶九先生暨其弟振六羽三與婁東貴池枋舉復社以繼東林當是時溫體仁閹黨也有子求入社先生堅持不可體仁怒搆是錄爲蠅蚋錄欲剗刃東南諸君子阮大鍼閹兒



也屏居南都謀起廢先生與社中人爲揭討之及大鉞得志又以是錄爲蝗蝻錄欲盡殺復社之主盟者先生始遭黨禍繼感滄桑每歎不得從王漢臣馬君常諸公攀髯殉國爲恨手執是錄默識社中人之精忠苦節口授子孫繼繼承承以至於今愚甫纘緒家學表章舊德猶先生志也不與元祐慶元黨人之子孫先後同揆者乎考元祐慶元黨人惟范氏蘇氏呂氏趙氏兄弟名在黨籍而先生兄弟實似之自先生至今二百年矣

朝廷

褒忠之典累下社中人得

賜諡

賜祠者若干人又

詔取遺集社中之述作登

四庫者若干卷闡發幽光亙古未有而愚甫爲之薈萃成書孜孜矻矻其用心亦可謂賢已愚甫又以錄中姓氏尙有千人未得羅其事行爲歎然予謂向微是錄之存則其姓氏滅沒當不可勝數今得揆輯過半俾讀是書者論世知人互相補輯拭目可俟也奚多退讓爲哉是爲敘

道光十年八月望日海鹽李聿求拜撰



自古來黨人之禍由於君子小人相激而成如漢之黨錮唐之清流北宋之姦黨南宋之偽學皆是也而其中亦各有辨至明季復社則又不同初天啓閒忠憲高公講學於東林書院一時學者皆從之游魏璫執國命欲盡其類鋤而去之其時望風希旨者至造爲東林點將錄將爲一網打盡之計夫魏璫庸奴安知東林爲何物其所以與之爲讎者乃貪位慕祿之羣小嗾之也及崇禎朝而復社興復社者太倉張溥爲之主盟溥以高門華胄文學傾動一時其始不過二三朋好以文會友而四方好名之士雲集響應若水赴壑當其大會於虎邱聚至二千二百餘人之多是時温相體仁因其子不能入社將興大獄幸當時有阻之者乃免而皖人阮



行元如... 卷首  
大鉞以魏黨削籍遁跡南京貴池吳應箕草畱都防亂揭以聲討  
大鉞罪同社諸子附和之大鉞切齒而無可如何也俄焉思陵殉  
社稷福王建國於舊京馬士英執政乃引大鉞爲本兵大鉞遂復  
理復社之獄若周鏞周鍾皆以莫須有之事罹棄市之禍諸君子  
亦幾幾不免幸我

朝大兵南下福王出奔而其獄始解夫士君子生當否運隱而不  
見以庶幾明哲之義誰曰不可然食毛踐土身受國家培養之恩  
忠義激發不能自已而又同志之士聲氣相孚則雖千百人又何  
疑其爲黨哉復社諸君子正以結有明二百餘年養士之局此復  
社之所以異於漢唐也是時吳江吳扶九有復社姓氏錄一編今

其五世從孫愚甫采輯遺事爲之小傳得一千二百餘人其闡揚  
前哲之意甚可尙也恭逢

本朝

聖聖相承大公至正於勝國忠義之士

裒恤無遺是編之傳多本之殉節錄豈清流白馬之事所可同類  
而並論之耶爰應其請而爲之敘

道光十有一年歲在辛卯秋九月吳縣石韞玉撰



易否之傳曰君子以儉德辟難朱子釋之謂收斂其德不形於外以辟小人之難旨哉斯言也方明之季顧端文高忠憲兩公講學東林書院東南士大夫翕然宗之其時魏闖亂國羣小醜正疾而仇之者造爲名目羅織以逞其毒書院旣輟文社踵興通都大邑文學之士所在以社名者蓋一二十數復社起而合之督之以規條申之以盟約而又閉關奔走要約而羅致之先後爲大會者三同社多至二千二百餘人聲氣之廣自古未有崇禎戊辰己巳閏復社之名動海內擯於社者以爲大辱社中之人以節義相尙目擊夫時事之濁亂羣奸之橫行其議論率慷慨激昂至南都之事不惜大聲疾呼撓兇鋒而明樹之敵以故陸文聲周之夔構之於



後亦如上海傳聞 卷首  
前阮大鍼王實鼎攻之於後當是時陳貞慧諸人之不死者其閒不能容髮吾反復是編不能不爲之歎惜不置也雖然諸君子之爲此也豈不知其足以賈禍哉要其忠義激發不能自己雖碎首捐軀而有所不悔迨明之亡朝臣覲顏辱國以求苟活而終至屠戮者何可勝數而社中諸君子名不挂摺紳位不列通顯皜然不滓逸民義士所在相望甚有逆

新命抗

王師身膏原野而卒被

褻恤於異時者然後知其平時節義相尙得於朋友切劘之力而非標榜以爲名高結納以爲豪舉也詩不云乎風雨如晦雞鳴不

已當蝸蟻沸羹之時猶有諸君子同方合志秉正嫉邪振頹俗而扇芳風此固東京清議之遺而世道之所維持於一綫者矣社事之成吳江吳扶九力爲多當時錄其姓氏爲一冊今其五世從孫山嘉又搜采事蹟之可見者爲傳略十卷予悲諸君子身丁否運不得以功名自見徒以聲譽太廣議論太激爲時所嫉而幾殞其身嗚呼惟其的之是以射之自古黨人之禍皆由於此豈惟復社也哉

道光十有一年十月元和吳廷琛拜撰



震澤吳君愚甫既刊復社姓氏傳略將竣移書王君硯農徵敘於  
鑑予辭則又抱其全橐踵門固請不獲已乃言曰古今陰陽消長  
初由君子之過激而其後禍遂中於國家不獨漢唐宋爲然勝國  
復社可見矣社學之興幾徧海內論世者不推原本末而徒河漢  
其說不惟梅村妄引黨禍爲非卽改亭辨爲無關國社之屋未爲  
深得也閒綜頭訖約有三端國表之選東鄉婁江之分合實不出  
文章聲氣一途魚山創之於前扶九先生繼之於後孟樸之舟車  
南北也傾貲出粟以西銘金沙爲主持不謂江浙提學遽承風指  
時相子弟欲入社而不可因兩越貴胄之奔競演爲綠牡丹傳奇  
詆孟樸爲鋪司於是學臣黎媿菴按試之日禁書毀板梏時相家



人刊時相子弟干謁之牘縣之長安市中時相始怒嗾同社推官  
周之夔作復社或問以發難重以王徐飛章四配十哲罪幾不測  
賴當路庇之同族同社之寶忠解之始免此婁江烏程開隙之漸  
可考一也其稱東林爲開山小人伎而入之君子樂而安之皆轉  
境也夫時相之忌刻有之矣陰鷲有之矣蔽賢有之矣誤國有之  
矣以思陵之嚴且明而謂匿闔以殘黨此不覈之言也至崇禎十  
一年而有留都防亂揭之事揭之作沈眉生同禮部主事周鑑讀  
書茅山共持清議大鍼以逆闔假子方挾聲伎輦金寶披猖國門  
貴池吳次尾宜興陳定生手訂爰書逐之初難其首長洲顧子芳  
後至曰此吾祖罪人也揭首舍吾其誰乃輔以梨洲子一子佩皆

社中巨擘而七君子之後春燈謎燕子箋酒後花前動相咀嚙此  
其率率東林可考二也自是逆案中人始與復社爲切齒不獨大  
鍼卽楊維垣張孫振皆是也無何都門失守五馬南渡先是史道  
鄰開府皖江痛其師左忠毅死於璫爲建忠烈之祠碑文出仲馭  
手指斥大鍼尤甚大鍼畜之久無以發也適張芑山奉旨鉞四書  
大全辨係姜燕及所奏遂榜僞學張自烈於通衢刊章四出將一  
網盡之會讞大悲之獄乃祖朋黨點將同志盜夥故智作蝗蝻錄  
爲十八羅漢五十三參善財童子七十二聖賢菩薩作蠅蚋錄爲  
八十八活佛三百六十五天王五百尊應真徧社藉中人入之發  
緹騎逮御史黃澍澍時監寧南軍而社中之被禍如次尾崑銅朝



宗匿其幕中日愆憑晉陽之甲逮至而三十六總兵之師東下傳檄遠近勢遂不支此東林復社相出入可考三也然則以姓氏始以姓氏終結二百七十六年之局者此三端也夫論史亦貴持平爾不知事之曲折而能持平者未之有也易曰差若豪釐謬以千里又曰小人用壯君子用罔兩言盡之矣今東林列傳已收入四庫諸閣史局初開卽

允詞臣之請一洗韓通無傳之陋而又於三孽殉節臣工特

賜專諡通諡卹典發潛闡幽迄今守土者以祠廟告所在多有吳江吳氏一錄原與貴池異地同揆夫祖宗有美而弗著不仁也愚甫雪鈔露纂成傳略若干卷用力勤矣尙歉不自滿以爲此未成

之稟將復取貴池所異者別爲補錄予因事略有未盡別書一通以塞其意并以爲讀此錄之助焉

道光十有二年歲在壬辰夏六月烏程張鑑撰



復社姓氏傳略例言

一高伯祖扶九公與張天如楊維斗諸先生會文講學肇舉復社以繼東林一時聞風者先後至宵小忌之幾成黨禍公有手輯復社姓氏及南都防亂揭一冊想見當日文章聲氣之盛山嘉不揣樸昧妄意表揚謹遵

欽定明史及各省府州縣志各家詩文集說部等書悉心按采共得若干人人各繫以出身事跡成傳略十卷茲附公姓氏錄後梓之亦欲使復社之子姓得共識先世之梗概與前代所以盛衰之故云

一入復社者皆端人正士明祚既絕諸君子出處各行其是洪



惟我

朝崇獎忠貞風勵名節順治九年

世祖章皇帝軫念明末殉難之臣自范景文以下二十人易名

賜祭社中如王章馬世奇並沐

恩施焉迨乾隆四十一年

高宗純皇帝

特命廷臣詳徵博采山野無遺不惟闖獻蔓延時窮節見俾從追

獎卽

天戈迅掃抗顏拒命者亦令一例褒揚恭讀

欽定勝朝殉節諸臣錄社中人得邀

予專諡通諡以及入祀所在忠義祠者復若干人闡發幽光亙古  
未有也至出其所學黼黻

盛朝者皆經濟卓卓美不勝紀是復社無非忠孝廉節之士若  
論者以吳昌時周鍾之喪身遂訾社中多偽學何得因千百  
人中之一二人而矢此苛論耶

一姓氏錄共二千二百四十人其達者豐功偉節彪炳史策或  
互見於名家誌傳采輯猶易也有科第出身軼事流傳者就  
所見郡邑志說部等書備錄之惟布衣之士潛修勵志或更  
易名姓韜晦終身欲求其嘉言懿行渺不可得故未考者尙  
有干人所望同志佐其不逮得以補輯成書惠莫大焉



一徐九一張受先兩先生經營社事最先而冊中不見其姓名可知與於社者猶未盡於此錄至一人而姓名重見者順天府崔子忠即崔丹朱錫鬯謂復社一二集丹均與焉故先後名字不同也若上海蔡文瀛改名樅而青浦又有蔡樅或係同姓名未可臆斷為一人冊中同姓名者吳江顧諤通州顧嘉四川簡元嘉同姓名并同字者徽州府胡士升字孟階貴池胡士升字孟階當時復社諸君多寄籍者如扶九公同懷弟振六羽三兩公一隸秀水學一隸湖州府學凡類此必詳明其本籍焉

一前人專論復社者有吳駿公復社記事陸道威復社紀略杜九高社事本末等書因卷帙過多不能盡載雜采數則登諸

卷首為復社事略

一古人著書每標出處裴松之註三國志劉孝標註世說新語及太平御覽等書皆如是朱錫鬯輯日下舊聞因之且曰不敢攘善也今竊取斯義惟略加彙括參用某書要無失古人之本意以期傳信

一是書摭拾舊文編薈成帙積年所錄相與參訂者海鹽李君

聿求張君開福桐鄉宋君志恆秀水鄭君照長洲彭君蘊琛

顧君沅吳江翁君廣平周君夢台陳君希恕金君作霖馮君

泰楊君秉柱仲君湘同邑張君湘王君之佐沈君眉壽家兒

音也校閱者黃生炳沈生元琛潘生錫經煥星姪一桂也



道光十有一年夏六月朔日吳山嘉識

復社姓氏傳略總目

卷首

恭錄乾隆四十一年

欽定勝朝殉節諸臣錄

御製詩

復社事略

敘文

例言

卷一

北直



卷二

南直

卷三

南直

卷四

南直

卷五

浙江

卷六

江西

卷七

福建

卷八

湖廣

卷九

廣東

河南

卷十

山東

山西



四川

廣西

貴州

復社姓氏傳略卷首終

復社姓氏傳略卷一

震澤吳山嘉愚甫纂輯

北直順天府

王崇簡字敬哉宛平人崇禎癸未進士 國朝官至禮部尙書其在宏文院 詔察明末殉節諸臣始末崇簡疏言在內如東閣大學士范景文以下二十三人在外如山西巡撫都御史蔡懋德等五人或其身仗節死或父母兄弟婦子相隨死或家人闔門俱死其忠烈相同宜並賜褒揚以廣作忠之典疏上時論以為允及在禮部益盡心職掌眷注日厚年七十七卒諡文貞有

青箱堂集 汪琬撰行狀



王世約字次重大興人順治戊子舉人

畿輔通志

范邦瞻字若侯大興人

舉人

兩朝遺詩

米壽都字吉士宛平人太僕萬鍾子順治五年貢生知沐陽縣子

漢雲順治辛丑進士康熙己未應博學鴻儒試授編修

鴻詞科

履歷冊

王章字闇然

崔丹字道母號青蚓先世萊陽人丹居京師補順天府學生通

五經能詩尤工畫董文敏公其昌異之謂非近代所有丹益自

重有以金帛請者概不應也李自成陷京師走入土室中餓死

朱彝尊撰傳

王谷字大含

蕭生煥字伯闇

蕭升字允之

韓四維字張甫昌平人崇禎辛未進士官春坊

畿輔通志

李仲熊字非熊永年人崇禎辛未進士官參議

同上

張永禎字仲燦天啓丁卯舉人

明詩綜

梁以樟字公狄大興人右副都御史應澤仲子崇禎庚辰進士授

太康令明年調商邱時賊犯開封所過糜爛商邱民間賊逼境

咸惶懼以樟按行城堡修守禦數單騎走風雪中拊循士卒王

午春三月李自成合衆數十萬攻商邱以樟嬰城戰城陷妻張



及子女僕從皆死以樟傷仆亂尸中商邱民救之三日復甦逮刑部獄獄中上書陳六事皆切中時務執政過之不獲上既以無罪出獄越數日而京師陷乃南下參史可法軍可法題為兵部主事經理河南命下而事已不可為遂寓居鄞縣凡三年而去未幾卒 王猷定梁烈婦傳魏季子集鄞縣志

牛裕範字式之

于奕正初名繼魯字司直宛平縣學生性好古嘗集天下金石志

其詩名樸草

明詩綜詩話

李茂才

王以約字敬止大興人

進士順治八年知太平府

江南

通志

周宗字本卿

韓四科字十甫昌平人崇禎壬午舉人

畿輔通志

崔子忠字開予原名丹字道母

事見前

溫良璞字仲青大興人順治戊子舉人

畿輔通志

黃鼎字惟梅

李經國

張希契字

大興人諸生子烈康熙庚戌進士己未應博學鴻

儒試授編修

鴻詞科履歷冊

李耿字毅侯大興籍江陰人崇禎庚辰進士知壽光縣 大兵

復土生氏傳各

卷一

北直

順天府

三



下壽光自縊城上乾隆四十一年 賜諡節愍 殉節錄明史邢國璽列傳

李子和字 江陰人崇禎己卯舉人 國朝順治六年任清軍

驛鹽道僉事 常州府志河南通志

房之屏字 東明人崇禎癸酉舉人知安定縣十六年賊陷城

死之 國朝乾隆四十一年 賜諡節愍 殉節錄

史可程字赤豹號蘧菴大興籍祥符人忠正公可法弟崇禎癸未

進士選庶吉士京師陷降賊賊敗南歸可法請置之理王以可

法故令養母可程遂居南京後流寓宜興閱四十年而卒 明史

史可法列傳

梁以桂字析木應澤三子順治丙戌舉人己丑進士 畿輔通志

傳作鼎

陳聖學字心王

孫嗣烈字繩甫

梁以柟字仲木應澤長子貢生少與海內賢豪游既從其父馳驅

王事後佐弟以樟力圖恢復事不就齋志以沒 王猷定撰祭文

孫 銘字咸若高陽人兵部尚書忠定公承宗子諸生崇禎十一

年 大兵攻高陽戰死乾隆四十一年 詔入忠義祠 殉節錄

明史孫承宗列傳

孫 鏞字虞維承忠子官尚寶司丞曉兵事善騎射崇禎十一年



從父守高陽戰死城下 國朝乾隆四十一年 賜諡節愍 同  
上

復社姓氏傳略卷一終

復社姓氏傳略卷二

震澤吳山嘉愚甫纂輯

南直應天府 國朝改江寧府

劉服膺字膺服

張一儒字彥先上元人天啓元年貢生官太平府訓導 上元志

孫石字介臣上元人宿學有聲崇禎十二年膺歲貢不仕晚年

減緣息慮求性學宗旨足不踰戶論者謂不愧先民典型云 同上

黃基字應存

王亦臨字穆如上元人崇禎己卯舉人有虎鼠菴橐牛闌集 同上



伍之又字從甫上元人順治三年貢生 同上

陳丹衷字敏昭號涉江上元人事母以孝聞為文閎奧自成一家詩原本離騷出入少陵長吉尤工書畫崇禎庚辰成進士授河南道御史召募苗兵甫持節而國變著魂遠游賦以自傷又為秋粕詩二百餘章晚年一意禪悅一飯一豆終其身有蔗渣橐二十餘卷 上元志無聲詩史

王潢字元倬上元人父之藩慷慨好義潢善色養崇禎丙子舉於鄉先是戶部郎中倪篤之薦於朝以賢良徵不就念世亂親老賦南陔詩以見志有南陔集 江寧府志上元志

周景濂字仍叔上元人崇禎己卯舉人 國朝順治乙未進士任

石阡推官 上元志

胡寧字伯純又字文以六合人貢生父光啓負郭課徒家故居城內每雞鳴門啓寧必趨省風雨靡聞父亡哀毀骨立迨居母喪年老矣一如喪父時 江寧府志

朱尙雲字 上元人崇禎十三年貢生 上元志

吳古懷字弗如高淳人年二十二始折節讀書師事同里邢昉晨興手一編至子夜弗輟數年學大成補縣學生見天下將亂曰士不可不知兵因習孫吳兵法著將論兵論數篇既而曰此陳言也乃以百金市一騾襍被出游徧歷三關及甘肅固原寧夏延綏諸阨塞遇老校退卒輒詢其險阻要領凡六年然後歸著



邊險圖說萬餘言福王南渡阮大鍼將以鉤黨致獄遂脫身入  
粵會江南不守歸棄儒服托跡堪輿自號三湖散人時走山巔  
水洩慟哭獨語及聞粵亡歎曰我尚可食人世粟耶抽刀自刺  
血淋漓灑地諸子傳以藥而甦防守數日卒自縊

南疆逸史

王 櫓字室藩

伍之璧

徐張吳字天巖

曾 魯

徐時霖字澤商周鑣弟子

思舊錄

伍以宏

溧陽 國朝改屬鎮江府

鍾 鼎字玉鉉一字節也為名諸生操選政有驚帆捷飛諸選膾

炙人口所著以欽崎磊落之才抒其悲憤時魏璫煽焰鼎選序  
中有孽豎煬聰衣冠短氣及廷中鹿馬等語指斥之弗避嘗以  
詩忤勢宦為所中鼎走京師抗疏闕廷事得直後更名鍾離楚  
崎嶇閩粵閒盡瘁以卒 鎮江府志

陳名夏字百史崇禎癸未會試第一殿試第三授編修晉修撰奏

對稱旨改授戶兵二科都給事 國朝薦授修撰陞吏部侍郎

歷官至大學士 同上

彭 旭字且兮崇禎壬午舉人 國朝康熙三年任丹陽教諭 同



上

吳穎字見末號長眉崇禎壬午舉人 國朝順治壬辰進士授  
刑部主事歷遷郎中恤刑八閩五閱月未減者千餘口出知潮  
州多惠政會從師海上中寒疾歸有蕤羹堂集溧詩選閩史  
同上

蘇州府

顧夢麟字麟士母夢神人授以石麒麟故名世居太倉雙鳳里時  
文教頽靡夢麟與常熟楊彝獨尙先民規矩海內謂之楊顧從  
游日衆相次取科第而夢麟僅登崇禎癸酉乙榜援例入太學  
平生沖淡醇謹長毛鄭學雅不欲居講道名每稱歸有光之言

曰漢儒謂之講經今世謂之講道夫能明聖人之經斯道明矣  
道何容講哉所纂有四書說約行世 汪琬楊顧兩先生傳蘇州府志

王啓榮字惠常太倉人順治十三年府學貢生 蘇州府志

陳新芝字徵靈常熟人順治九年府學貢生任豐縣教諭 同上

姚宗典字文初長洲人文毅公希孟子能傳家學爲人敦孝友重  
節概中崇禎壬午順天舉人國變後隱居山中有雲菴詩文集  
同上

吳繼善字志衍太倉人博學辨智書一覽輒記文體古麗取法漢  
魏崇禎丁丑成進士謁選得成都令時寇陷荊襄或尼其行繼



善不可遂聞道之官見蜀事棘啓請蜀王發帑金備寇弗從甲申八月張獻忠兵傅城下王始出金募戰守者莫應賊攻圍三日夜以巨礮穴城東北陬而震之城崩王遇害繼善不屈死闔門死者三十六人

太倉州志吳詩集覽

張 誼字孺高太倉人順治七年貢生

太倉州志

周 蕝字其章太倉人本姓胡崇禎庚辰成進士復姓胡名周蕝官刑部給事中立朝數月封章十餘上嬰權忌罷職明年復起以親老辭 國朝 詔起在籍縉紳周蕝卒辭不赴

同上

鄭敷教字士敬號桐菴長洲人學有師承文章卓行爲儒者所宗崇禎庚午舉於鄉時詔巡方舉核孝廉厯四院皆疏薦丁丑舉

賢良方正以母老辭晚歲鍵戶著書年八十卒私諡貞獻

蘇州府志

吳晉瓚字流玉

周 羣字子達

吳麟趾字瑞生

陸 坦字履常嘉定人崇禎庚午舉人與同年楊廷樞以名教自任銓授南豐令不赴隱鄧尉山有庚除詩藁

太倉州志明詩綜

袁 徵字公白吳縣人崇禎元年恩貢生有蘧莊遺藁

蘇州府志明詩綜

黃鼎吉字新侯吳縣人順治十六年貢生

蘇州府志



後而始傳明 卷二  
施澤縣字子長

王節字貞明吳縣人爲諸生時周吏部順昌被逮吳民環聚呼

冤節請巡撫毛一鷺以民情上聞毛不聽遂直斥其黨奄奸狀

坐除名禁錮後奄敗得復名於庠舉崇禎己卯鄉試 國朝順

治中任桃源教諭未幾歸 同上

周崇階字六階崇禎十七年貢生 同上

徐樹丕字武子長洲人少補諸生姚希孟器重之妻以女屢試不

利益博覽羣籍善楷書兼工八分年八十八卒有中興綱目識

小錄杜詩註 楊无咎撰傳

孫琅字示亮

許元弼字仲良吳縣人天啓丁卯舉人官通判 蘇州府志

費元鼎字君求

王一經字子傳一字心古吳縣人順治戊子副貢生授陝西伏羌

令十五年再補河南延津善政卓卓有古循吏風邑處子午之

衝一經殫心調劑憂勞以卒卒之日不能殮同官贖之始得歸

櫬 河南通志

唐開虞字五臣

顧荅字云美吳縣人崇禎某年貢生工詩文及行楷八分書尤

精篆籀之學所刻印章必追摹秦漢晚年居虎邱塙影園求詩

文篆刻者踵至非其人不輕與也時縣思陵御書肅衣冠再拜



復初姓曰傳略 卷二  
欵獻太息女一妻常熟瞿式耜子易其姓名俾脫於禍人尤高之  
蘇州府志

凌必正字聖功號約菴太倉人崇禎辛未進士授戶部主事出知建昌府有異政忤上官意左遷真定同知旋署府事陞廣西兵備按察司副使卽其祖雲翼平苗建功之處必正紹先業潔己惠下士民戴之十七年歸里屏跡荒野與華乾龍陳瑚講學終其身  
太倉州志

胡 演字序九

王家禎字子來太倉人少孤與呂雲字同硯席張溥見其文奇之引爲弟子生平勤著述年七十自序云窮老氣盡紙乾墨燥而

不自已於天人古今大要多所闡發其自負如此  
同上

祝升吉字允升

陸夢熊字熊占

瞿元錫字伯聲常熟人忠宣公式耜子崇禎壬午舉人任溧陽教諭  
蘇州府志

吳世培字無念

時載杲字旭如常熟人入徑山修淨業  
徑山志

黃允奇

陳鴻寶字若山

施其象字子象

夏仕生氏傳略

卷二 南直

蘇州府

七



顧宇王字宣美

許士斌字懋金

張 儁字非仲府學生有西廬集 明詩綜

韓 馨字幼明八歲作擘窠大字書陽山長雲峯及虎邱五人墓

碣董其昌陳元素賦詩以贈年十三補府學生入南雍司成王

某評其文曰文兼韓柳書擅羲獻阮大鍼居金陵以金帛招致

堅拒歸後與黨人獄幾陷不測少從劉曙學曙殉難經紀其喪

葬之虎邱自是絕意進取卜居洽隱園卒後私諡貞文有紺雪

堂橐洽隱園遺墨 蘇州府志及家述

張惠法字來宗

朱 坤字順卿

顧 韡字鄂生太倉人嗣子子振以孝聞知州錢肅樂給獎額 太

倉州志

李可衛字爾公

李文煥字有章

沈介立字石文

黃晉昌字錫侯

王景元字殿先

王宏緒字長生

許振光字起文



顧王祥字瑞典

吳中柱字柱石一字玉書吳縣人康熙十五年貢生任顧榆訓導

蘇州府志

徐宗器

太倉州 國朝升直隸州

張溥字天如號西銘幼嗜學為諸生與同里張采共肆力經史名籍甚號婁東二張崇禎元年以選貢入都采方成進士兩人名徹都下已而采官臨川溥歸集郡中名士相與復古學名其文社曰復社辛未溥成進士選庶吉士以葬親乞假歸讀書若經生無閒寒暑四方噉名者爭走其門交游日廣聲氣通朝右

執政大僚惡之里人陸文聲者輸貲為監生求入社不許采又嘗以事扶之文聲遂詣闕言溥采倡復社亂天下溫體仁方柄國下其事於提學御史倪元珙元珙移兵備參議馮元颺元颺下太倉知州周仲璉遷延久之言復社無可罪三人皆貶斥嚴旨窮究不已閩人周之夔為蘇州推官坐事罷去疑溥為之恨甚聞文聲訐溥亦伏闕言溥等把持計典已之罷職實其所為因及復社恣橫狀章下巡撫張國維等國維言之夔去官無與溥事亦被旨譙讓至十四年溥已卒而事猶未竟刑部侍郎蔡奕琛坐黨薛國觀繫獄未知溥卒也訐溥遙握朝柄已罪由溥因言采結黨亂政詔責溥采回奏當是時體仁已前罷繼者張



至發薛國觀亦罷去而周延儒當國溥座主也其獲再相溥與有力焉故采疏上事即得解明年御史劉熙祚給事中姜埰交章言溥砥行博聞所纂述經史有功聖學宜取備乙夜觀遂有詔徵溥遺書有司先後錄上三千餘卷帝悉畱覽溥性忠孝事母極婉順談朝廷事輒欲有所澄清與朋友周篤聞正人患難如身受卒年四十無子私諡仁孝

明史列傳太倉州志

張源字來宗溥論天下名士輒屈指曰我八兄九兄八兄謂源

九兄謂濬也

吳偉業張母潘金兩孺人墓誌

趙自新字我完四歲失足墮井家人引縋出之無怖色年十一從父觀射飛矢中股醫者出鏃色不變喪母家貧身執厮養役而

勤學弗輟崇禎己卯舉於鄉十六年需次京邸忽心痛遂歸父病果劇乙酉詣州守請給僧牒祝髮於松江之會龍菴旋隱嘉定之封家村如臯冒襄聞之請教其子既而有謝姓者告以應舟山之招自新謝之及事洩逮者至門自新曰吾久辦此矣械至松江絕食數日不死復械至江寧鞠謝姓者卒無實得釋歸旬日卒年五十三臨沒謂其子曰吾生無益於世沒後題墓石曰明鄉進士憤道僧趙某願足矣自新面目嚴冷人望而畏之著作甚多陳瑚陸世儀皆其弟子

太倉州志

王家穎字處卿

吳偉業字駿公號梅村父琨以經行崇祀鄉賢偉業幼有異質時



經生家崇尚俗學偉業獨好三史張溥見而歎曰文章正印其在子矣因畱受業年二十補諸生未踰年中崇禎庚午舉人辛未會試第一殿試第二授編修給假歸娶乙亥入朝充纂修官值溫體仁柄國有奸民張漢儒陸文聲之事體仁實陰主之偉業疏論無少避丙子主湖廣鄉試戊寅召對進端本澄源論極剴切上為動容己卯銜命封延津孟津兩藩王陞南京國子監司業甫三日而黃道周論武陵奪情廷杖信至乃遣太學生涂仲吉上書頌冤干上怒嚴詰主使幾不免庚辰晉中允諭德癸未晉庶子甲申之變適丁嗣父憂里居服除南中召拜少詹事越兩月遂歸杜門十年 本朝薦授秘書院侍講國子監祭酒

間一歲奉嗣母喪南還遂不出年六十三卒遺命墓前一圓石題曰詩人吳梅村之墓有梅村集四十卷綬寇紀略十二卷顧湄撰行狀

管士琬字君售

張 濬字禹疏溥兄順治甲午副貢生 太倉州志

張王治字無近號救菴溥弟崇禎某年拔貢生 國朝順治丙戌

舉人丁亥進士授桐廬令縣故無城郭編戶凋殘王治悉心招

徠上官交薦擢工部給事中遂疏論東南漕兌之害請設官收

官兌法兼以五米五銀刊為定例又請開濬三江及江南分置

藩臬並見施行其他論列皆切時要卒以峭直為眾所忌削籍



歸 同上

何南春字梅先天啓甲子舉人 蘇州府志

張達孝字孚先天啓丁卯舉人 同上

許煥字堯文順治乙酉舉人丁亥進士由莆陽令陞知嘉興府

吳詩集覽

孫以敬字令修號浣心崇禎丁丑進士任甌寧令六載政教推八

閩第一行取入都復令長垣防禦流寇甚力見時事日迫遂歸

太倉州志

蔡伸字伯引

周肇字子俶五歲識奇字十歲爲文師嗟異之以總角爲張溥

高弟貢入太學中順治丁酉順天舉人時科場事起同考官論

死肇親爲治殮兼以橐餕濟其家四經 御試久之得青浦教

諭舉卓異陞新淦令時肇已病力疾之官未幾卒 同上

吳克孝字人撫號魯崗鎮洋人崇禎辛未鄉試受知於吳江縣知

縣熊開元丁丑成進士授刑部主事進員外恤刑粵東平反滯

獄至千二百餘人比報政會開元下錦衣獄奉密旨卽訊取死

狀克孝夜半詣金吾請寬旦夕卒以營護得遣戍出備兵保定

保定府殘破盜賊晝夜掠郡縣日選丁壯乘城守克孝至盡撤

之用鉤距法密擒渠魁秦鳳吾等斬以徇羣盜遂散以目眚假

歸甲申補嘉湖道參議時平望黃岡及平湖海鹽各處大盜蜂



復而姓曰傳明 卷二  
起克孝募健勇練水師擒盜黃文魁姚二等斃之築盜葉六集  
黨千餘劫官鞘又斗張三者橫行剽掠俱捕以正法目貴益劇  
遂告歸年八十一卒 同上

朱明鏞字昭芑參將廷璋子諸生性強記天資絕人工制藝世變  
後遂棄去專力於史所著書史異同新舊唐書異同二書先成  
其餘有史典史幾史略史風史游史嘉史異史最史俳史鑿史  
粲史糾十二種平日事親孝與人交推誠任素所居席門環堵  
處之晏如卒年四十六 同上

吳偉節字青臣

周 鞏字子豐

周 楨字子方  
袁 賁字幼白諸生與兄臨皆恃才負氣不可一世時稱二袁甲  
申後祝髮入山稱龍蔭大師 同上

周 南字二為

周 祚字逸休

吳國杰字純祐崇禎癸未進士任永嘉令 國朝順治十四年知

確山縣 蘇州府志

穆雲桂字苑先鎮洋人諸生從張溥游敏達豪宕篤友誼黨禍熾  
同社生往往從決策多所挽救溥弟王治以給諫改官甫旋里  
跟踰就逮雲桂先期北發傾身營護王治得削籍歸而雲桂幾



爲忌者所中平生周旋故舊於患難死生之際凡三十年

鎮洋志

李登雲字縉黃崇明人崇禎庚午舉人 國朝順治己丑進士授

刑部主事游歷眞定知府有政聲築滹沱河民被其澤著有恆

山餘蹟載白馬堤記

崇明志

張宿字朗文

吳縣祚字燕餘常熟人杜門註易拮拾自資爲墨吏所辱抱恨而

死年六十四

吳詩集覽

王瀚字原達諸生國變後爲恭謝聖廟入山詩百首遂爲僧號

晦山大師名戒顯字願雲

婁東耆舊傳

李誠字徵久號子厚好學耽詩居窮巷苦吟不輟古貌古心不

與人合許廷鏐亟賞其詩每相過必竟夕談云

太倉州志

吳養元字頤仲

浦荃字瞻叔

王瑞國字子彥號書城弱冠中天啓辛酉舉人束修砥行文震孟

姚希孟皆折輩行與交周順昌罹瑞禍裏金急其難馬世奇殉

國設位誄以哭之性高簡研精書史無晷刻閒 國朝順治十

二年授增城令三載告歸築瘞硯齋著述以老

同上

何如玉字渭聖

王令荃字星宰



王令蒞字如穀

管文瀾字止觀

陶 鑽字涪水

王 御字欽仲又字聖乘敦正學憤流寇披猖思廓清世難與陸

世儀王發祥諸人講求兵法以選貢中崇禎丙子舉人 國朝

順治十二年謁選得宿松教諭移六安州學正所至整葺學宮

訓迪士子遷房山令以簡靜慈愛為政革除規例不名一錢髻

年告歸猶好學不衰世儀謂其超悟似陳白沙年九十三卒私

諡敬一 同上

錢 源字天來

許 燝字雙平

金達盛字道賓

曾五典字子敘崇禎癸未進士甲申任東陽令不三月告病去人

稱其賢 江南通志

張文源字古潢

曹中龍

王家祥字止吉諸生博通典籍尤精於天文地理知州白登明設

書院於沙溪延為院長 太倉州志

王 挺字周臣奉常時敏長子諸生以廕補中書舍人在官七月

上疏請破格用人奉使兩浙却餽遺不宿官舍不赴公宴復命



卽請歸養 國朝順治十一年薦舉賢才辭不就晚年廢目日  
令子弟誦書以聽爲文口占使書之名其稟爲不盲集 同上

王聖涯字泳臣

吳偉光字孚令偉業季弟諸生 吳詩集覽

呂雲奇字石英少具至性讀書至忠孝節義事輒反覆不置嘗私  
著一編第古今人物高下最上者爲師次者爲友早喪母父嬖  
妾虐使之雲奇益孝敬父感悟曰汝若此夫復何言順治二年  
遇兵與父匿叢棘中父受縛雲奇躍出乞父命不聽皆殺之家  
人覓其屍猶見兩手抱父甚固乾隆四十一年 詔入忠義祠  
殉節錄太倉州志

歸默靜字公書

王 洵字 崑山人志慶子 崑新合志

王 洄字宛仲志慶子爲諸生有至性事伯父志長甚謹善讀書  
兼達世務嘗與盛符升葉奕苞輩續修邑志 同上

王 揆字端士號芝屨時敏次子崇禎己卯舉人 國朝順治乙  
未進士應以推官用因養親不出康熙己未巡撫慕天顏薦舉  
博學鴻儒亦不赴平居志切民生如蘆洲稅課蠹弊力請當事  
釐之劉家河久淤上書巡撫爲之浚鑿事尤其大者後以子原  
祁貴贈如官卒年七十一 太倉州志

陳 瑚字言夏號確菴少通五經凡天官河渠兵農禮樂以及壬



奇諸書無不貫串與陸世儀江士韶盛敬相劇切世所稱四先生者也崇禎壬午領鄉薦明年江南大饑上當事救荒四政支吾三策揜腕時政著私議十條又著續議五條皆切要或勸上之曰此非借箸時也鼎革後奉父避地崑山之蔚村躬耕以養

國朝 詔舉隱逸知州白登明將以其名上瑚力辭乃已卒

年六十三私謚安道

同上

王啓綦字天路

程允基字救功

黃與堅字廷表幼從呂雲孚學以諸生拔貢入成均廷試第一

國朝順治丁酉順天中式己亥進士授推官旋以奏銷註誤已

未應博學鴻儒試授編修擢贊善典貴州鄉試時湯斌以禮部

尚書掌詹事並有輔導皇太子之命 上難其副大臣羣推與

堅遂以原銜充講官既有忌斌者嗾廷臣交章劾與堅獨不

署名以葬親乞歸年八十三卒

同上

周同升

趙 新字賓日

王發祥字登善鎮洋人日新子弱冠有文名崇禎丙子舉人 國

朝順治乙未進士除刑部主事轉員外奉命視學湖北詳列規

條董率士子尤以表揚忠孝貞節爲急各邑志乘皆經論定又

刊全楚詩文一時人文興起十七年兼攝湖南學政以事牽連



解任尋還原職赴都候補卒 同上

周家藩字方侯

計榮

王宗遠

曾紹唯字韶季順治乙酉舉人試身言書判居上等授三河令縣

當山海喜峯古北諸口衝非幹吏不能勝任紹唯守己以潔勤

理公務民咸德之總督等各具疏薦將陞用以勞瘁卒 同上

周縣存字嘏常諸生早喪母事父孝父亟稱之則曰大人幸勿言

意恐妨於弟兄也順治二年遇兵縣存謀他徙父不聽遂及難

同上

趙晟字方旭

王日新字鑑明號眉岳精經學為名諸生尤畱心經濟通達治體

每為長吏咨訪時明季大亂日新絕意科舉肆力於天文地理

之學星緯形勝瞭若指掌甲申後韜晦遯跡躬耕於野吳偉業

贈詩比之伏勝桓榮年五十四卒 鎮洋志

周如珍字九獲

呂挺儒字乾士

呂鼎吉字玉士

張泳字幼濤幼有才貢入國學期滿授布政司理問遷宗人府

經歷值弟溥以復社被糾乃歸崇禎九年薦舉賢良方正不就



明水利嘗獨力濬鹽鐵塘三舉鄉飲大賓 太倉州志

陸世儀字道威號桴亭天姿英邁弱冠志聖賢之學謂孔子之後有真儒周公以下無善治其學以居敬窮理為本而推極於體國經野凡天官地理禮樂河渠以至用兵行陣之法口區手畫燦若列眉窮居授徒隱然負開濟之重鼎革後體驗益精著述益富順治間督學張能鱗聘輯儒宗理要一書後講學於錫山東林書院說易於毘陵大儒祠設教於雲陽黃塘聞風親炙者皆感動奮發卒年六十一私謚尊道亦曰文潛 同上

江士毅字 乙酉七月遇兵隨父德璜匿後園父見執士毅出求代遂俱死 同上

郁棠

呂國植字王芳

程靖獻字伯昭

周遵成字叔行

徐徵仕字公遠

吳維藩字价人

周航字化渡順治戊子副貢生官四會縣知縣 蘇州府志

張 配字孝瞻

浦 峒字君達崇禎某年貢生 同上

長洲



朱 隗字雲子諸生雅尚文藻復社與隗與張溥張采楊廷樞楊  
彝顧夢麟等分主五經文字之選馳驅江表為一時蔚顧詩宗  
中晚唐人稱為徐禎卿唐寅之流亞晚歲當貢不赴有尺聞齋  
藁 江南通志

姚宗昌字瑞初希孟子諸生名與兄宗典齊屢試不遇有皇明鑑  
始莖齋詩文藁 蘇州府志

沈 幾字去疑崇禎辛未進士官福寧知州 同上

李 楷字仲木崇禎壬午舉人 國朝順治中任工部員外郎 同上

許元溥字孟宏父自昌官中書舍人以篤行稱構梅花墅聚書連

屋元溥生而沈靜日出其書徧觀之於經義罔不淹通尤邃於  
易立高陽社課子弟喜購書自號千卷生崇禎庚午舉於鄉不  
仕卒私諡孝文 同上

顧啓宗字公遠

劉 曙字公旦號穉圭崇禎癸未進士授南昌令未赴南都失守  
江西路絕歸隱蠡口 國朝順治丁亥上海諸生欽浩通款舟  
山疏吳中忠義之士二十三人以曙為首曙實不識欽也其書  
為游騎所獲巡撫土國寶密令捕曙既見國寶不屈械送金陵  
下獄八旬九月十九日赴市連呼高皇帝而死初曙以父病割  
左股痕三寸許至是僕覓屍視股痕為驗云乾隆四十一年



賜諡節愍

殉節錄蘇州府志

華

渚字方雷其先自無錫徙吳少穎悟弱冠補諸生時張溥張

采揚廷樞方主盟文社渚皆游其門鼎革後棄諸生屏居菟討

六經子史及醫卜種植之書文筆古峭兼工書年六十九卒有

逸民傳句吳華氏本書

李奕拓傳

錢位坤字與立常熟人崇禎辛未進士官兵部郎中

蘇州府志

沈明倫字伯敘精春秋崇禎癸酉以恩貢中順天副榜乙酉後授

徒自給三十餘年卒有春秋辨志全旨及松窓暇錄鼓缶等集

同上

管正傳字元心號德園太倉人崇禎辛未進士歷知永豐贛縣著

風節為忌者所中死有積書巖詩草

太倉州志明詩綜

王 宋字東尹

戴之傑字石房諸生

兩朝遺詩

陳 性字身之

張 奕字綏子

薛宗廉字伯清

劉 暘字公夏

郭兆驥字天行

楊右烈字亦文

嵇山材字天因



韓 燦

楊肇祉字昌孟崇禎十七年貢生 蘇州府志

許 洞字孝酌

戴之儁字務公諸生為松江提督吳勝兆參謀說勝兆反正與陳

子龍通款舟山約水師於丁亥四月十六日至松江事洩之儁

被殺 參忠烈紀實

盧源材字河生崇禎己卯副貢生 蘇州府志

朱 陵字望之隗弟能詩畫 江南通志

趙承鼎字啓新

陳 羽字用儀

薛宗孝字孝仲

陳宗之字玉立祖光祖父繼華皆舉人宗之攻苦力學崇禎癸酉

以春秋舉於鄉癸未中會副授推官以親老辭歸性端方沈篤

邃於古學詩文無纖靡之習有持論十集古樂府存匏園賦草

山志鷗吟雪籟吳鈴等書 蘇州府志

文 乘字應符文肅公震孟子諸生南都亡隱山中有誣其與吳

易通者逮至官乘不辨徐曰不敢辱我父願就死妻周氏吏部

順昌女亦殉 國朝乾隆四十一年 詔入忠義祠 殉節錄蘇州府志

顧延周字孝侯崇禎壬午副貢生 蘇州府志



後元好問傳  
卷二  
黃卷字萬公

申繹芳字維思文定公時行孫參政用嘉子諸生應授中書有怡

社合集古松軒橐閩游詩靜成齋集

吳門補乘

顧之俊字仲容吳江人崇禎癸未進士南都立授奉化令 國朝

順治二年 大兵下杭州閏六月寧波錢肅樂起兵守禦之俊

應之明年六月魯王航海入閩之俊從亡晉官御史以剛直著

後入粵從永明王死於肇慶

蘇州先輩小傳錢肅樂集同里先

哲記

徐枋字昭法號俟齋少詹事忠節公泚子崇禎壬午舉人南都

不守泚家居殉節方脫身亡命棲息土室又為邏者所得逃東

渚後避地上沙之澗上終身不入城市賣字畫以自給其往來

者崑山朱用純吳門楊无咎萊陽姜實節吳江潘耒而外罕得

見其面湯文正公斌撫吳時屏騶從往訪不得見歎息而去卒

年七十有居易堂集

長洲志吳縣志

吳縣

楊廷樞字維斗號復菴兵部尚書成孫孝子大滌子生而岐嶷言

笑有度崇禎戊辰以恩貢入大廷都人士聲氣相求知廷樞者

半海內遠近負笈而從者皆名士周順昌被禍舉國轟然廷樞

以身左右之幾及於難庚午以第一人冠南畿深患子丑以來

文體變壞於是力追先正自嘉隆迄於成宏以上蒐輯而討論



之又論定神廟丙辰以後之文制義家奉為科條焉甲申聞變誓以身殉時馬阮每指目廷樞為復社渠魁大兵下蘇州隱居鄧尉山順治四年降將松江總兵吳勝兆復謀叛廷樞因其客以憇憑之事敗追捕至官諭令薙髮廷樞不屈遂斬於蘆墟之泗州寺年五十三門人迨紹原購其屍葬焉私謚忠文有古柏軒詩集乾隆四十一年 賜謚忠節 殉節錄明史徐汧列傳

蘇州府志

徐鳴時字君和少喪父赤貧寄食蕭寺為句讀師藉修脯以養母知縣萬谷春首拔之從游日眾室隘不能容乃於隙地構室取楊萬里老夫稼圃方雙學之句顏曰雙學崇禎十年以選貢除

武寧令有惠政卒於任私謚貞隱有橫溪錄 蘇州府志

錢 禧字吉士諸生司選政有聲亂後住寶華山 姓氏註

朱 鎰字彥兼吳江人八歲好讀春秋十二歲作貞貴篇彙行世父陞宣以其文呈文震孟姚希孟兩公皆奇之曰此吾輩中人也一時間人如艾南英輩至蘇必投刺求見十八歲三試冠軍為吳縣學生亂後隱於黃冠以卒 松陵文獻同里志

袁良弼字星況

章 美字子充號拙生諸生崇禎某年以薦舉授永城令 蘇州府志

周茂蘭字子佩忠介公順昌長子順昌被逮茂蘭尾舟徒行至京



口順昌恐其俱死磨之返順昌喪還泣血三年慘動行路愍帝立誅逆奄贈順昌太常卿給廕諡建祠賜額茂蘭以父仇未報刺指血上疏請誅奄黨倪文煥等得俞旨既歸不就廕敘國變後隱居不出湯斌撫吳式廬就見郡舉鄉飲賓堅辭不應年八

十二以諸生終私諡端孝

墓誌表傳合纂

蘇州府志

周茂藻字子潔順昌次子諸生有文行著有蛩吟草

陸世廉字起頑號晚菴諸生儀度修偉長於說經九試鄉闈不售

崇禎十三年以薦舉授廣州府通判在南中累遷光祿卿遭亂

歸隱自號遐園主人有遐園誌年八十五卒

鄭敷教撰傳

朱袞字九章本姓金少從其父永昌宦寧夏參軍往來燕趙間

馳騎游獵頗任俠自喜諸邊帥爭欲延入幕府意不屑也既歸

里始折節讀書補縣學生復本姓改名俊明字孝章數試於鄉

不利最後復赴試筮易得蠱之艮遂不終試而歸踰年明亡又

踰年王師渡江人始服其知幾云善書畫長於梅竹卒年七

十四私諡貞孝有春草閒房詩集退量橐

汪琬撰墓誌

邱民瞻字天民諸生少游文震孟朱陸宣之門持身甚嚴內行純

備篤於倫誼國變後野服不入城市

徐晟撰傳

徐籀字亦史汧從姪崇禎癸酉舉人高才博學風流蘊藉本

朝康熙初由靖江教諭遷黃岡知縣愛民息訟薄賦省刑見囚

輒泣下欲生之士民皆感激時邑多火災籀捐二千餘金分賑



復補如日傳冊卷二  
又修建學宮補葺古跡文物燦然在官無泛交紳士端方博雅者延致加禮邑人謂以文學治者必首推焉有吾邱五集寓黃

小草 黃岡志

管捷字帝錫又字膚公順治庚子舉人辛丑進士 蘇州府志

周肇祺字公齡

陳遷字照鄰

孫喬字子良

許元愷字德先

沈磐字石均諸生

國朝詩別裁集

施之朝字羽聖崇禎十年以薦舉授奉新令 蘇州府志

楊廷楷字則正

衛澂字神清

錢安修字方明又字行安常熟人隸籍吳縣學宮游張溥張采之門稱高弟子安修爲人故短小虎邱社集時諸名士欲望見顏色者皆舉踵以得見爲幸所作詩古文詞堅古峭拔絕不猶人有潭溪集十卷錦樹堂慶節詩三卷年二十九卒 同上

沈初榮字滋先吳江人諸生 沈氏家乘

錢祐字良士

丁觀韶字九儀

張邕字羽民



陳 邁字孝寬

胡以鉉

吳江

吳 翮字扶九號靜菴貌魁碩善談論詩文瀏灑藻麗弱冠負重名莊烈帝立凡奄黨悉置於法翮與同志孫淳等四人創爲復社義取剝窮而復也太倉張溥舉應社以合之海內知名士皆聞風而來翮於邪正是非之介確然不可易時溫體仁方柄國屢招致翮卒不應同邑呂純如要一見亦終不得以是爲忌者所構幾陷不測以序年當貢值鼎革遂絕志仕進杜門著書篤嗜天官象緯之學所藏明人文集至三千七百家手自纂輯乙

未秋卒年四十七私諡孝靖沒數月遭盜劫所藏書及所著歷法彙散佚殆盡其內弟沈祜晉與其婿計東蒐其遺彙爲升恆堂集十卷行於世

諱

陳濟生撰傳震澤志

同邑後學翁廣平填

吳有涯字茂申九歲作貧夫論人咸異之天啓丁卯領鄉薦崇禎中謁選得金壇教諭遷平陽知縣首立十禁又請折海運止預征政聲大著甲申聞變爲國喪議諭衆人後果詔至哭臨惟平陽得如禮南都破避地樂清遂入閩召對自晡至夜侃侃數千言有真御史之衷擢廣西道御史巡按浙東在閩三月前後疏凡四十七皆軍國急務以道梗駐處州浙東兵潰遂爲僧隱鄧



尉山久之返故里幽憂發病遂卒年六十八有客編奏議四卷  
燕游草 王載撰傳 同邑後學翁廣平填諱

吳昌時字來之崇禎甲戌進士爲文選郎中周延儒再相昌時之  
力居多繼以年例出言路十人於外言路大譁掌科給事中吳  
麟徵掌道御史祁彪佳御史蔣拱宸俱劾之詞連延儒給事中  
曹良直亦劾延儒十大罪帝怒勒延儒自盡而昌時棄市 明史  
周延儒傳

吳昌壽字眉之改名陞號端伯御史煥長子崇禎十七年貢生 吳  
氏家乘

吳昌迪改名允迪字迪之煥次子崇禎壬午副貢生 同上

吳 易字日生太僕邦楨孫少有才名負氣矜奇兼好兵法通任  
俠雅不欲以經生自見崇禎癸未成進士不謁選而歸明年北  
都失守易感憤作恢復議四篇洞晰形勢福王立謁史可法於  
揚州可法異其才題授職方主事爲已監軍明年徵餉江南未  
還而揚州失已而吳江亦失易走太湖與同邑舉人孫兆奎諸  
生沈自駟自炳武進吳福之等謀舉兵旬日得千餘人屯於長  
白蕩出沒旁近諸縣道路爲梗唐王聞之授兵部右侍郎兼右  
僉都御史總督江南諸軍楊文驄奏易斬獲多進爲兵部尙書  
魯王亦授易兵部侍郎封長興伯八月 大兵至易敗走父承  
緒妻沈及女皆投水死明年易鄉人周瑞復聚衆長白蕩迎易



入其營八月事洩被獲戮於杭州草橋門年三十五有東湖集  
客問十三篇及富强要覽諸書乾隆四十一年 賜諡節愍 殉  
節錄明史楊文驄列傳松陵文獻

吳允夏字去盈博雅好古邃於理學事母謹治家嚴肅如公府入  
太學累試不第崇禎末歲饑民相率掠富家允夏發粟賑濟全  
活甚衆嘗感火葬非古作廣孝哀言以警衆因自置義冢一區  
掩埋遺殮至五千有奇知縣葉翼雲重其行遣使致羊酒謝不

受 松陵文獻

吳晉錫字茲受號燕勒崇禎庚辰進士授永州推官時四方盜熾  
晉錫團練鄉勇永始有兵旣張獻忠陷長沙巡撫王聚奎偕諸

潰將奔永永民畏焚掠咸避去城空晉錫將奔訴於朝會新撫  
何騰蛟至移檄追還命掌武昌推官事甲申南都詔至左良玉  
擁重兵意不測騰蛟將以死徇晉錫說其正紀盧鼎等得開讀  
無他變騰蛟疏陳晉錫守永功命未下以爲衡永郴桂團練監  
軍乙酉良玉反騰蛟投江水獲救不死乃抵長沙命晉錫以長  
沙推官攝郴桂道事丙戌唐王徵兵於楚晉錫請行騰蛟不許  
別遣郝永忠永忠欲得晉錫兵晉錫悉以其兵隸之唐王擢晉  
錫廣西布政使晉錫將行而永忠尙屯郴郴民苦之詣晉錫請  
畱晉錫不得行加大理寺卿仍攝道事 大兵日迫郴地益危  
晉錫誓死守旣而騰蛟在長沙檄晉錫督餉晉錫去郴永忠果



激民變屠柳而去丁亥永明王以晉錫巡撫衡永柳桂長寶會  
湘陰長沙兵變騰蛟奔衡州湖南無尺土晉錫知事不可爲遂  
爲僧入九疑山 大兵招降之不可遂南歸杜門不出著有增  
補玉棹銀河集半生自紀孤臣泣血錄等書子兆寬兆宮兆騫

兆宜並工文

震澤志吳氏家乘

呂雲孚字石香太倉人年十二嗜周秦古書及揚雄太元經文師  
樊紹述孫樵詩師盧仝李賀爲張溥稱許嘗試吳江時熊開元  
爲知縣課論語畏匡章雲孚穴竒抉奧讀者幾不辨句讀開元  
大竒之拔以冠軍遂爲吳江學生乙酉 大兵至里人多逃死  
雲孚以母故守舍不去死之年三十二門人黃與堅輯其遺藁

太倉州志

沈應瑞字聖符號介軒諸生少以詩文名乙酉後絕意進取當事  
舉賢良方正不就生平篤於友誼周人之急無倦色給事熊開  
元遣戍定海迎其家居於別墅解橐以濟尹職方民興於危皆  
爲人所難卒年八十五

震澤志

葉 襄字聖野長洲人父教授在外從母張受學銳志經籍爲名  
諸生甲申後隱居不出攻詩一以唐人爲宗儷語有六朝風致  
元和新志

張 堯字山堯太倉延陵之家僮也少受業趙自新能文章張溥  
收之爲弟子列名社錄延陵不之許使供隸役堯避之張采所



延陵拘繫其父母采爲堯請甚力事解而使執役如故堯不能  
堪舉家徙武林吳昌時處之賓席未幾而溥言之學使者厠吳  
江鬻序延陵控當事求正叛亡罪卒不勝久之溥屬知州周仲  
璉仲璉進贖金爲堯削隸延陵勉從之而仇復社滋甚

復社紀

略

包捷字驚幾嗜學而性堅確以文章氣節自任崇禎壬午舉於  
鄉甲申後入穹窿山爲頭陀自號磴菴足不入城市好讀文山  
指南錄雪菴河西傭諸記時時流涕吳易死於杭親族莫敢視  
捷往收其骸葬之又經紀其家嫁其女如己女年四十三卒有  
西山集詩古文二百餘篇

震澤志

包振字朗威與兄捷同舉於鄉築草堂於硯山嘯歌自得不慕

世榮與捷蓋同志云

同上

包掄字尙賢捷弟諸生乙酉八月死於兵

家述

周燦字闇昭號光甫吏部尙書恭肅公用元孫崇禎辛未進士  
歷知宣化會稽縣擢御史巡按江西福王立於南京宗室朱統  
鑣誣劾楊廷麟謀不軌燦具疏白其誣歸家後堅臥不起有西  
巡政略澤畔吟

周氏家乘

沈初馨字青芝

張澤字草臣諸生

明詩綜

沈自炳字君晦號聞華副使琬子恩貢生福王立薦授中書舍人

復社姓氏傳略

卷二

南直

蘇州府

三



從吳易舉兵及敗赴水死有丹棘堂集 國朝乾隆四十一年

詔入忠義祠 殉節錄明史楊文驄列傳家述

顧 誠字賓日

顧 諱字明子崇禎十七年恩貢生 吳江志

趙 庠字渙之號大庠崇禎癸未進士乙酉知甌寧縣值浙西潰兵至閩所在剽掠庠登陴固守民得安堵丙戌六月閩中初舉鄉試庠爲同考官遷行營禮部儀制司主事改文選司赴延津患足痺請告寓高陽山中建寧破遂爲僧往來吳越閒不與家相聞最後居天台國清寺辛卯冬自浙赴靈巖過穆和溪遇風舟覆而死有雅南堂詩橐 松陵文獻明詩綜

趙 席字公珍

俞允懷字懷茲平湖人諸生受知於張溥冉冉名場三十年發爲聲歌多高淡寂寞之想有海濱野老集 樵李詩繫

戚 干字右朱

龐承源字生一南直訓導秉道子諸生 龐氏家乘

陳紹祉字孝將號耐菴名譽籍甚邑侯至必厚餽納交後棄諸生徙居同里亢溪橋之別業終身不入城府 同里志

周振孫字麟伯東閣大學士道登子廕生 吳江志

潘 凱字仲和號貽令諸生高才績學婦翁德清章日疥來知吳江縣凱深自晦匿惟陰言民間利害雪人冤抑一無所私申西



之際轉側兵閒遂破其家亂定歸故里四壁蕭然觴詠不輟年  
四十六卒私諡貞靖有平望志本草類方及詩文若干卷子櫝  
章諸生未以布衣應康熙己未博學鴻儒試授檢討

發潛錄遂

初堂集

周廷祚字長生御史忠毅公宗建子諸生宗建死詔獄崇禎初廷  
祚入都爲父復仇請卹典時郭鞏以宗建之死實自己倡因屬  
馮銓謂廷祚曰苟無言當以一第及萬金相報廷祚曰父仇卽  
死不避富貴可餌我耶遂疏劾鞏得擬辟時法司以許顯純田  
爾耕崔應元先世軍功止擬絞廷祚赴法司堂大叫曰此輩慘  
斃諸忠尙不擬辟豈爾輩猶貪重賄耶法司悚然皆正典刑而

宗建遂得贈太僕寺卿立祠建坊後周延儒再相以內閣中書  
招廷祚謝不往福王立阮大鍼餌以職方主事廷祚力却之觸  
其怒幾不測卒後私諡孝節

黃宗羲撰墓誌

顧祖奎字元度天啓辛酉舉人崇禎中選丹陽教諭作五倫箴鏡  
板明倫堂以訓諸生陞連城知縣廉惠有異績黃道周作序頌  
之唐王立福州累遷戶部郎出知南寧府唐王死遂爲僧居隆  
安之林村後之肇慶卒於鼎湖山白雲菴年六十六弟祖斗走  
萬里迎其骸骨挈其子與母歸人高其義祖斗字文度諸生  
同  
里先哲記蘇州先輩小傳

李世芳字濟美一字凌凡崇禎十二年薦辟

蘇州府志



葉世佺字雲期虞部紹袁長子府學生能守遺訓絕意進取與諸

弟並窮困而死 松陵文獻

沈學閔字孝甫

孫兆奎字君昌祖履恆習兵家言兆奎能世其學倜儻有氣節崇

禎丙子與吳易同舉於鄉乙酉南都亡奮然思以死殉國乃就

易謀同起兵長白蕩以家財給餉復以易聲望出己上推為主

盟而已佐之時稱孫吳軍 大兵來討八月二十四日軍敗兆

奎父允貞沒兆奎乃沈妻褚及女於湖視其死而後自溺溺未

死為 大兵所執降之不屈遂解赴江寧斬之臨刑賦詩顏色

不變年三十九乾隆四十一年 詔入忠義祠 殉節錄明史楊

文驄列傳震澤志

孫聚奎字君祥

計 名字青麟諸生同邑吳兆騫少時簡傲不拘禮法名見其所

作膽賦嗟賞之曰此子異時必有盛名然當不免於禍至丁酉

科場事起兆騫遣戍眾謂名知言子東有才名 參今世說

吳 旦字海曙有涯從子諸生與吳易同起兵易敗走且戰死 南

疆逸史家乘 同邑後學翁廣平填諱

沈初晉字方平諸生 沈氏家乘

史宗邠字古公諸生隱居西楊村 吳氏家乘

沈永隆字治佐號列泉自晉子諸生乙酉後從父隱居吳山工詩



詞父遺產三百畝自取其瘠者三十餘畝以讓庶弟年六十二

卒 吳江志

徐 墀

盧 煒字赤文

沈 虬字次雪一字雙亭號蘭村順治八年貢生知錢塘縣後調

嘉善罷歸能詩尤工書 震澤志

常熟

楊 彝字子常萬厯之季士之為文者喜倡新說昨違傳註彝與

太倉顧夢麟力明先儒之說天下翕然從風稱楊顧學以歲貢

為松江訓導作興人材甚廣居五載擢知都昌縣以道阻弗克

赴任明亡遂不出晚歲目盲猶令人讀書其側為諸生講說無

少倦年七十九卒

汪琬楊顧兩先生傳

許重熙字子洽崇禎初北游太學一時鉅公推其有良史才既刻

五陵注略觸誠意伯劉孔昭忌將發難祭酒倪元璐爭之力因

并攻元璐牽連參閱姓氏七十五人俱東林知名者時溫體仁

當國陰主之擬旨推究三上不允而解數游金陵維揚匡廬閒

諸藏書家延致商訂學益博識益高所著有歷代通略大臣年

表行世宋史增定新編綴籬草旅寄軒橐俱未刻年七十八燈

下猶細書輿地分合指掌圖未竟卒 蘇州府志

徐濟忠字良夫一字子公諸生少孤苦以教授自給屢試不得志



而卒善古文詞有綴閒集 姓氏註

蔣 棻字晚仙崇禎丁丑進士除南海令催科有法丁艱服闋補  
建安縣時多盜警棻濬城隍行保甲募鄉勇得勝兵數百屹若  
雄鎮巡撫張肯堂舉廉幹第一陞禮部主事未赴遭國變遂歸  
年六十卒 常熟志

祝謙吉字尊光崇禎癸酉舉人任桃源教諭 蘇州府志

魏 冲字叔子又字道用生而丰姿玉立嘗覽鏡自笑曰有美如  
陳平而長貧賤者乎為舉子業與其兄浣初齊名冲尤為駿雄  
浣初成進士冲尚應童子試年三十餘始中崇禎庚午舉人庚  
辰復下第將就教職引鏡自歎曰如此人戴老廣文紗帽他日

何面目復對此鏡乎歔歔慨歎發病而卒同舍生王夢鼎為視  
含斂扶其櫬以歸有小碎集 列朝詩集

許 瑤字文玉祭酒士柔子順治乙酉舉人壬辰進士歷官至四  
川參政有孝經約註一卷竹厂詩集十二卷 蘇州府志

孫朝讓字本芝一字光甫崇禎辛未進士由刑部員外出知泉州  
府後陞江西右布政使未赴而明亡時年未五十杜門不出詩  
文多發天然草書法孫過庭年九十而終 同上

戴 萃字仲繁

趙士春字景之崇禎丁丑進士以第三人及第授編修明年兵部  
尚書楊嗣昌奪情視事未幾入閣士春上疏以為不可謫廣東



布政司照磨後復故官終左中允 明史趙用賢列傳

祝泰吉字彙征

王 政字以正本姓張太倉人順治九年貢生 常熟志

彭 和字元發

陶世濟字仁育

王曰俞字喜廣少勤學父母憐而節之乃帷燈潛誦以舉人教諭

六合崇禎癸未與子澧同登進士知餘姚縣期年去官 同上

許重遠字子兼

蘇 震字震亨又字長侯嘉定人黃淳耀弟子父母有疾衣不解

帶至為嘗糞事兄嫂如事父母甲申後隱居不出與陳瑚諸士

儼陸元輔結東臯社 太倉州志

史遺直字叔魚又字信甫吳江人天啓甲子舉人 震澤志

史雲縉字希仲

許 棐字輔公

朱 鑣字右服

顧煥先字令徽

錢 宏字毅生

朱一鳴字廣源

王賓臣字子敬

王師臣字子學



王 亮字開度

楊 靜字定夫彝子諸生自少能詩文年二十二卒 蘇州府志

孫 穀字文石

吳世陸字襄明

李 曄字實甫

崑山

周錫成字我成

王志慶字與游刑部主事臨亨少子年數歲即泛濫經傳及子史  
大家集天啓丁卯舉於鄉五上公車不第甲戌歸語張采曰國  
步蹙矣可奈何出感事詩百首曰吾以告哀會有詔舉賢良當

事上其名以病辭乃葺東郊丙園作終老計號漢陰丈人壬午

秋七月疽發背致書張采曰病發膏梁在表治易病發憂鬱在

裏治難遂卒 蘇州府志

陸世鑾字彥修崇禎己卯舉人 同上

金 珩字白公

王志長字平仲臨亨次子崇禎庚午舉人庚辰中乙榜奉特旨與

甲榜同授官感夢以歸遂不出自題其文曰晚香集 同上

顧 絳字寧人號亭林改名炎武年十四爲諸生明亂遂棄舉業

屏居山中講求經世之學後以貢薦授兵部司務再薦職方主  
事皆不就明亡縱游天下所至考其山川風俗證以金石碑碣



凡所論述皆上下古今貫串精核卓然成一家言當代咸推爲通儒著書數十種年七十終無子 同上

陸遜之字子敏崇禎某年以薦辟爲縣州知州 崑新合志

陸從先字是古

朱志熹字司選

曹開遠字彝伯

葉奕佺字元暉

歸奉世字文若贈翰林待詔子慕子 姓氏註

沈元凱字今預

王啓棠字永君

張立平字邇求吳江虞部葉紹袁以季女瓊章妻之婚期先五日

瓊章卒 午夢堂集

張立廉字鴻一崇禎丙子舉人儻好義與兄立平敦善不怠明亡削髮僧裝博綜教乘嘗集乙酉後殉難諸紀錄爲玉峯完節

錄八卷 崑新志彙

朱集璜字以發貢生學行爲鄉里所推數論郡邑中利害當事多聽之南都亡崑山人議拒守而縣丞閻茂才已遣使迎降縣人殺之以六月望推舊將王佐才爲主集璜及周室瑜陶炎陳大任等並舉兵參將陳宏勳前知縣楊永言率壯士百人爲助大兵至宏勳率舟師迎戰敗城陷永言遁去佐才被殺集璜遂



投東禪寺後河死有絕命詞畱衣帶閒曰可質祖宗可對天地  
生無自欺死復何愧私謚節孝乾隆四十一年 詔入忠義祠  
殉節錄明史侯峒曾列傳蘇州府志

葛雲芝字瑞五年十五補諸生游張溥之門又爲張采壻二張皆

亟稱之明亡盡棄所學潛心求道以姚江爲宗入山獨棲一室

竟日瞑坐見者疑爲神仙有臥龍山人集 徐枋撰傳

支萬春字彙昭如璋子崇禎十七年貢生 蘇州府志

徐桓鑒字惠朗華亭人與陳子龍善子龍死桓鑒往收其屍遂憂

悸出游客死桐城 陳忠裕公年譜

陳用臯字子來

周 佃字子圓

張次琦字玉賢

李 軒字昂侯

孫元愷字若士與顧夢麟楊彝並以諸生持文柄爲詩學昌黎古

文詞嚴峭近柳州天性高介史可法開府揚州辟參其軍事具

題子職辭弗受讀書賦詩以終 江南通志

顧 燾字謔明

周本宏字元祐

歸繼登字爾復昌世子崇禎癸酉舉人十七年爲長興教諭死於

兵 蘇州府志湖州府志



歸錫侯

徐開遠字仲舒崇禎己卯舉人任汀州推官

蘇州府志

盛符升字珍示號誠齋順治庚子舉人康熙甲辰進士授內閣中

書晉禮部主事至監察御史尋罷歸年八十六卒少師事夏允

彝張溥鄉舉出王士正之門早有文學耄而好學著述甚富有

誠齋詩彙及崑山志

崑新志彙

嘉定

國朝屬  
太倉州

朱之尚字令古

侯岐曾字雍瞻給事中震陽少子年十一與兄峒曾岷曾同補諸

生及長博覽工文重氣節敦行誼吳門婁東雲間壇坫角立岐

曾調劑其閒順治三年以匿陳子龍被逮當事陰使人致酒脯

曰汝湖海無名待家信通得不死岐曾曰我已無家何信為遂

受刑私諡文節乾隆四十一年 詔入忠義祠 殉節錄嘉定志

施鳳儀字孟翔號侶簫崇禎丁丑進士任武昌推官廉潔不畏強

禦歷兵部職方司郎中後隨史可法殉難揚州

寶山志

徐時勉字克勤崇禎庚辰以歲貢注名特用榜中授澄城令刻勵

清操為猾吏所中落職臨行邑紳孫弼明贈麥六斗曰此非交

際禮為使君數日糗糧耳歸而僦居城中精毛詩學者宗之

太

倉州志

曹 訥字忍生崇禎癸酉舉人

蘇州府志



後元姓傳四 卷二  
陶士彥字啓聖

沈宏祖字彥深高才博學邑有大事有司咸往問之崇禎十五年侯汭等以折漕事詣闕上疏彙出宏祖手得俞允遇歲荒有司請主糶給官米民得實惠屢膺薦舉不出

太倉州志

馬舒字應之元調子少承家學鼎革後屏居荒村教授餬口工古文康熙十二年聘修邑志二十年復請修補以疢疾作而沒同上

陳琦徵字保臣順治五年貢生任合浦縣知縣

蘇州府志

汪貞泰字大來

張國濬字在公

黃淳耀初名金耀字蘊生爲諸生時深疾科舉文浮靡淫麗乃原本六經一出典雅崇禎癸未成進士歸益研經籍緼袍糲食蕭然一室京師陷福王立南都諸進士悉授官淳耀獨不赴選及南都亡嘉定亦破愾然太息偕弟淵耀入僧舍將自盡僧曰公未服官可無死淳耀曰城亡與亡豈以出處貳心乃索筆書絕命詞遂與淵耀相對縊死年四十一淳耀弱冠卽著自監錄知過錄有志聖賢之學後爲日歷畫之所爲夜必書之晚而充養和粹造詣益深所作詩古文悉軌先正卓然名家有陶菴集十五卷私謚貞文 國朝乾隆四十一年 賜謚忠節 殉節錄明史列傳



傳凝之字令融崇禎癸酉舉人南都失吳淞總兵吳志葵結水寨於泖湖凝之參其軍事兵敗赴水死 國朝乾隆四十一年

詔入忠義祠

殉節錄明史沈猶龍列傳

許自俊字子位父大達有隱德自俊中康熙庚戌進士主司得其文以爲年少高才及拆卷乃崇禎癸酉舉人至是三十八年年已七十矣又九年舉博學鴻儒試罷授聞喜縣尋乞歸又三年卒自俊記誦該洽詩文絢爛傾動一時事父孝搆遲日草堂爲父招老友時尋壺觴花藥之樂里人以老萊子目之 太倉州志

婁復聞字思修貢生堅子亂後死於兵

列朝詩集

侯 沆字彥直一字記原岐曾長子諸生九歲聞祖父論李可灼

紅丸事輒曰楊漣旣與方從哲同被召在內廷當進丸時何不面諍而顧從衆出宮門乎聞者大奇之嘉定折漕已久明季復令輸五萬餘石以助軍興沆詣闕上疏得免士民賴焉是歲壬午以例監生中順天鄉試乙榜會世父峒曾殉國二子演潔俱從死有司名捕其幼子澣沆慮世父無後挾澣以逃達於支硎之中峯訛言追者將至沆乃遣澣而徧書澣姓名於衣襟投水代之以救得免遂易服夜走吳山復至中峯而澣亦閒道渡江匿揚之天寧寺越三年澣死沆拊胸曰吾萬死一生以保吾弟爲世父遺孤計耳今顧至此極乎遂歸以長子乘嗣演後乘天又以次子來宜繼之臨沒命以母弟涵之子萊爲已後著有學



古十函學易折衷月蟬筆露柜園集西畱詩草諸書 汪琬撰墓誌

龔用圓字智淵天啓辛酉舉人崇禎末為秀水教諭見時事孔棘棄官懷印歸其家人已避居石岡村舍會侯峒曾黃淳耀謀城守用圓遂慨然訣妻子協守南門衣不解帶者匝月東門破左右勸啓關出弗聽赴水死 國朝乾隆四十一年 詔入忠義祠 殉節錄明史侯峒曾列傳太倉州志

沈懷祖字公述諸生死於兵 太倉州志

申 艇字虛舟三歲而孤母楊氏撫之成立讀書砥行中崇禎庚辰副榜隱居奉母授經以老著有見聞隨筆皆明代三百年中

軼事有關風教者 同上

朱 珽

夏雲蛟字啓霖諸生奇貧力學夏則糊紙筐夜覆頂拒蚊嚴冬以草實甕置足其中侯峒曾雅重之延致家塾與黃淳耀講學時有黃夏之目性伉直輒面責人過淳耀呼為畏友城破儒服自縊於家 國朝乾隆四十一年 詔入忠義祠 殉節錄明史侯峒曾列傳太倉州志

施鳳鳴字嘖岡

鄭 燦

侯 洵字文中岐曾仲子諸生年二十一卒妻夏氏允彝女工詩



善琴奕撫孤子繁守節繁天遂截髮爲尼

太倉州志

侯 法字研德晚更名涵字中德號掌亭岐曾季子少補諸生受

經黃淳耀之門 王師下江南世父峒曾父岐曾先後殉國上

官又有沒峒曾遺產及捕其幼子澣之令時法仲兄洵前卒兩

從兄演潔已從世父死伯兄沆又挾澣以逃有司遂執法應命

脅以嚴刑俾白澣踪跡法慨然力辨不少動久而得釋乃攜家

走他縣凡三年而始遷郡城又三年而歸故里適伯兄亦歸相

與經理故產僅餘十之一性友愛析產一聽伯兄字仲兄遺孤

繁勝於已出繁殤哭之得嘔血疾遂不起年四十五有掌亭集

若干卷玉臺金鏡文一卷私諡貞憲

汪琬撰墓誌

李杭之字僧筏流芳子畫筆酷似其父乙酉死於兵

列朝詩集

李 拱改名陟字瞻慎又字舜良崇禎十七年恩貢生

蘇州府志

崇明

明屬太倉州國朝因之

黃 元字九輪

崇禎人弱冠舉於鄉好古博學工屬文與

崇禎五年



黃宗憲

崇明 因陳因之 則歸大會也

李 姓如 字訓 號又字 蘇 吳 崇 順 十 十 年 恩 賞 主 有 崇 寧 集 蕪 湖 志

李 林 之 字 曾 翁 流 芳 于 畫 筆 韻 以 其 父 之 西 亦 於 其 因 陳 稽 業

復社姓氏傳略卷三

震澤吳山嘉愚甫纂輯

松江府

夏允彝字彝仲號瑗公華亭人弱冠舉於鄉好古博學工屬文與

陳子龍等結幾社崇禎丁丑成進士授長樂令善決疑獄五年

邑大治尚書鄭三俊舉天下廉能知縣七人以允彝為首帝召

見將特擢會丁母憂未及用京師陷慟哭累日毀家倡義走謁

史可法與謀興復聞福王立乃還其年五月擢吏部考功司主

事疏請終制不赴馬阮屢招之拒不應服除猶不起御史徐復

陽者故逆案中人至是復官希要人指劾允彝及其同官文德



後元如丘何時 卷三  
翼居喪授職爲非制兩人實未嘗赴官無可罪吏部尙書張捷  
遽議貶秩調用未幾南都失允彝徬徨山澤間欲有所爲聞友  
人徐石麒侯峒曾黃淳耀徐汧等皆死乃以八月中賦絕命詞  
自投深淵以死允彝學務經世歷朝制度暨昭代典章無不諳  
習獨處一室志常在天下名旣高四方人士爭走其門書問酬  
答無暇晷好獎勵後進有片善稱之不容口多因以成材允彝  
旣與子龍齊名晚節亦相似人謂白首同所歸云 國朝乾隆  
四十一年 賜諡忠節 殉節錄王鴻緒明史彙列傳

朱 灝字宗遠太學生崇禎中以保舉授延平府通判 松江府志

徐方廣字思曠諸生記問覈博與人言某事出某書第幾卷第幾

行無一誤者爲文精微研妙李流芳亟稱之性狷甚有門人餽  
遺頗厚惟受一剪刀人服其清介 華亭志

李 雯字舒章崇禎壬午舉人父逢申官工部主事遭誣謫戍雯  
匍匐走京師訟冤甲申父殉闖難雯募棺殮之饘粥不進者累  
日 本朝定鼎內院諸大臣憐其孝且知其才薦授宏文院中  
書舍人分考順天鄉試卒於官 南滙志

周室勳字辰臣

周希文字范若

姜爾珏字兩玉崇禎某年貢生 松江府志

徐鳳彩字聖期華亭人父爾遂太學生以文行知名長子孚遠仲



鳳彩少致遠時有雲間三徐之目鳳彩以諸生入太學六經皆有纂述尤精於詩有詩經輔註四卷 華亭志

林希灝字贊明太學生 王澐撰林伯子傳

張寬字子服邵陽令軌端子諸生降將松江提督吳勝兆反寬與其謀事敗逮至南京斬於市 三藩紀事本末

薛已鼎字義炎

夏鼎字九象崇禎八年選貢生 松江府志

朱積字元蘊又字早服崇禎癸未進士選庶吉士 華亭志

張壽孫字謀遠又字詒女崇禎癸酉舉人 國朝任大名府推官 同上

鞠履傳字子先

徐期生字處柔一字無爽崇禎庚午舉人任太倉州學正 松江府志

李待問字存我華亭人崇禎癸未進士授中書舍人被劾歸 國

朝順治二年募兵助沈猶龍守東門城破被殺乾隆四十一年 賜諡忠節 殉節錄明史沈猶龍列傳

范鏊弧字冠軍

郁繼垣字選士崇禎丙子舉人 國朝任虹縣教諭 華亭志

宋家禎字瑞生一字艾詒華亭人博學善文崇禎庚午壬午兩登 乙榜考授州判未仕卒生平純孝篤行見重於世有鳩菴文集



修吉堂詩草惜陰雜筆 松江府志

喬 基字公定

翁起鵬字扶九諸生 見王澐贈詩

沈漢冲

唐 正

蔡秉謙

陸慶滋

王宗熙字孟衍崇禎癸未進士官某縣知縣 華亭志

宋元鼎

華亭

周立勳字勒卣刑部茂源從子與陳子龍夏允彝齊名為雲間五子之一以太學生屢試不第留滯南雍未幾客死 奉賢志

徐孚遠字闇公爾遂長子崇禎壬午順天舉人南都破與夏允彝起兵不克遂入閩唐王授福州推官擢兵科給事中唐王敗浮海至浙時魯王駐舟山孚遠入朝擢左僉都御史舟山破從亡入閩戊戌桂王遷孚遠左副都御史是年入滇失道入安南還從魯王入臺灣未幾卒少時與陳子龍夏允彝言志慨然流涕曰百折不回死而後已後果如其言有十七史獵俎諸編 南吳舊話魯之春秋

彭 賓字燕又崇禎庚午舉人 國朝為汝寧推官才華震盪不



後亦如長傳冊卷三  
屑以肺石繩人巡方使者劾之罪幾不測賴御史李某之力得  
薄遣歸 三儂贅人廣自序

俞廷諤字彥直天啓甲子舉人以博雅稱於時陳繼儒修郡志廷  
諤實佐之 華亭志

顧開雍字偉南貢監生秀羸多才與陳子龍夏允彝諸公並起名  
滿海內晚築室在跨塘橋外竹木森秀琴書瀟灑獨坐一室凝  
塵寂然前輩風流猶可想見也 松江府志尊鄉贅筆

吳沂字中水

盛慶遠字靈飛

徐煒字元宣諸生 見王澐贈詩

徐致遠字武靜爾遂季子兄孚遠入閩後致遠奔走急難屢瀕於

危吳高士騏亟稱之 華亭志

周季勳字成子

嚴龍字子猶

唐醇字復西一字去疵改名景真諸生鼎革後幅巾布袍屏居

一室有馬蹟堂詩藁 松江詩鈔

張密字子退軌端次子順治二年恩貢生官南京兵部司務 夏節愍集註

宋卓字立萬又字人峩諸生 見王澐贈詩

錢穀字子璧一字內史書法精勁有後江集 華亭志



李 懷字素心崇禎癸酉舉人 國朝順治壬辰進士授禮部主事  
事歷官至湖廣分巡僉事卒於任 松江府志

徐纘高字孝若崇禎丙子舉人乙酉松江城破遂遁跡披緇入吳  
依要離墓旁僧舍以居有易學三卷 經義考

盛重禧字孝來

盛重輝字孝潔

林 萼字古繁

董宏修字于家

郁汝持字子衡崇禎癸未進士官評事 松江府志

薛 靖字義瑛一字邇機崇禎癸酉舉人 華亭志

陸慶裕字文饒順治某年貢生候選知縣 松江府志

王家福字聖臣工部員外郎漢良子諸生 陳忠裕公集行述

陸慶臻字集生號薺菴崇禎壬午舉人 國朝順治八年選推官

不就 青浦志

翁起鶚字子上諸生 見王濬贈詩

陸慶衍字孝長號椒頌崇禎癸未進士 華亭志

王 溥字大來改名濶字勝時陳子龍弟子其處師生患難之際  
卓然有東漢節義風以諸生貢入成均不得志縱游齊梁楚粵

晚歸老康園有輞川集 婁縣志

徐 喆字吉人

夏仕生氏傳略

卷三

南直

松江府

六



彭容字愚若

沈汝祺

夏完淳字存古允彝子諸生生有異秉嘉善錢梅以女妻之七歲能詩文年十三擬庾信作大哀賦文采宏逸十五從軍磨盾草檄不異老生宿儒唐王時官中書舍人允彝死後二年以陳子龍獄詞連及逮下吏作樂府數十闕臨刑神色不變年十八國朝乾隆四十一年賜諡節愍

殉節錄明史陳子龍列傳夏存古事略

上海

潘桓字殿虎原名煥寯有奇才於書無所不窺屬文典奧好古

識奇字天啓丁卯舉於鄉

上海志

馬元調字巽甫諸生徙居嘉定南城五歲時聞張應武邱集論說輒竚聽不移足既受學於婁堅洞悉經史源流凡古今典制名物靡不淹貫每閱一書必購別本校勘點畫之訛學者稱簡堂先生後與侯峒曾黃淳耀等守城城破時年已七十死之國朝乾隆四十一年詔入忠義祠

殉節錄明史侯峒曾列傳太

倉州志

宋存標字子建崇禎中選貢候補通判尋中壬午乙榜授南京翰林院待詔以國變歸里存標自少負才名為幾社領袖嘗彙刻社中古文為壬申文選性喜吟詠和唐人名作殆徧其詩名遙



和集 松江府志

朱在鎬字周望號遷公崇禎壬午舉人 國朝任廣信府推官 上海志

潘 敞字九閔桓子例貢生考授通判 同上

潘堯納字弗迷

喬世埴字子方年十三補諸生聲望蔚起當湖呂濬襄陽方岳貢

咸器重之九試不第卜築西郊名其園曰秋爽日與知交嘯咏

其中 國朝順治十一年由貢 廷對未及官卒有玉版陽秋

十卷燕喜堂彙紉蘭草 同上

范蜚弧字貳師

范彤弧字樹鏃一字細侯師事周立勳立勳卒心喪至於廢食後

入都從范文肅公文程游嘗至遼瀋覽袁崇煥壁壘閱戰地因

詢父老述崇煥功甚詳又讀文程行狀知其以反閒殺崇煥歸

每為人言其冤著有繡江集 松江詩鈔

喬鼎臣字殿史順治十三年貢生知內鄉縣 上海志

徐天麟字凌如號退谷崇禎辛未進士幼孤好學年三十餘始補

諸生及官南京兵部郎中蕭然如寒士乞終養歸詩文忼爽有

奇氣有西郊草堂集廣蔭軒雜詠行世 同上

王有孚字尹玉順治十一年貢生官某縣知縣 同上

何 剛字慤人崇禎庚午舉人見海內大亂日講求濟世事十七



年正月疏陳選練滅賊諸策帝褒納之卽擢職方主事募兵金華甫出都而國變馳還南京先是賊逼京師剛友陳子龍夏允彝將聯海舟達天津爲緩急用募卒二千人至是令剛統率及南都立子龍入爲兵科言防江莫如水師更乞廣行召募委剛訓練從之尋進剛本司員外郎以其兵隸史可法踰月而揚州被圍剛佐可法拒守城破投井死 國朝乾隆四十一年 賜諡忠節 殉節錄明史史可法列傳

包爾庚字長明天才豔發試輒冠軍崇禎丁丑進士知羅定州行取入都遭祖母喪不赴會天下多事隱居青谿之曲自號宜壑居士 國朝 詔徵山林隱逸當事強起之以母老力辭康熙

元年太守郭廷弼聘修郡志臨終端坐高吟而逝 上海志

蔡文瀛字季海華亭人父紹襄兄文陞皆舉人文瀛才高不售書畫皆工董其昌亟稱之後改名樅更字季直 松風餘韻

青浦

陳子龍字人中更字臥子號軼符生有異才工舉子業兼治詩賦古文字卓絕流輩崇禎丁丑舉進士選紹興推官東陽諸生許都反旬日間聚衆數萬連陷東陽義烏浦江遂逼郡城巡按御史左光先以撫標兵命子龍爲監軍討之以定亂功擢兵科給事中命甫下而京師陷乃事福王於南京其年六月言防兵之策莫過水師海舟議不可緩請專委兵部主事何剛訓練從之未



幾列上防守要策請召還故尚書鄭三俊都御史易應昌房可壯孫晉並可之又請擢諸生涂仲吉舉人祝淵於言路不從明年二月以事不可爲乞終養去子龍與夏允彝同負重名允彝死子龍念祖母年九十不忍割道爲僧尋以受魯王部院職銜結太湖兵欲舉事事露被執乘閒投水死 國朝乾隆四十一年 賜諡忠裕 殉節錄明史列傳

宋存楠字尙木後改名徵璧崇禎癸未進士授中書舍人充翰林院經筵展書以國變歸里 本朝薦授秘書院撰文中書後以從征舟山有功陞潮州府知府卒於任有抱真堂詩集 奉賢志 杜麟徵字仁趾參政喬林長子崇禎辛未進士授刑部主事少從

父宦曉習吏事尙書使掌章奏時太監張彝憲等總理部事監宣大諸鎮麟徵上疏極諫舉天啓近事爲戒舉朝歎服尋改兵部職方司爲尙書熊明遇所重其請授諸將事權及定滇寇普名聲麟徵條畫爲多又上書論時政得失有賈鼂遺風丁母憂歸卒年三十九有浣花遺稟行世 松江府志

王元圓字默公華亭人陳子龍幼從受經共相倡和元圓詩頓壯渾直務去纖渺嘗作擊劍行子龍父見之稱其雍雅爲廊廟之器 松風餘韻

杜駿徵字徠西喬林三子 青浦志

趙侗如字人孩



杜甲春字端成麟徵長子崇禎壬午副貢生 上海志

翁德璋字德生

李是楫字原煥順治某年貢生授惠安知縣奪情赴任卒 松江府志

志

蔡 樅

湯 琢

王 健

曹鳳苞字夏士

張安茂字子美號蓼匪右諭德以誠三子陳子龍夏允彝倡立幾社會者數百人安茂常為之冠詩名藉甚 國朝順治乙酉舉

於鄉丁亥成進士累官陝西西寧道參議康熙四年致仕 松江府志青浦詩傳

金山衛 國朝改為縣

盛翼進字鄰汝松江人與陳子龍善丙子九日雨中子龍同客集

翼進樓賦詩紀事極歡而罷 陳忠裕公集

宋與琦字又韓中書舍人天顯子闖賊陷京師偽旨召天顯寫詔

天顯厲聲罵賊以頭觸堦而死與琦聞變即欲入都時南北路

梗日夜椎心泣血福王立上疏請卹得允賜葬遂襮被首塗備

歷艱險扶櫬南歸一路哀號不絕聞者隕涕 松江府志

杜騏徵字回思喬林次子崇禎中由監貢官浙江監紀同知 上海



志

趙 孩字聲侗

董象祖字視烈

姜爾珠字慈授諸生 松江詩鈔

董宏學字非究

王輔世字德一

王 烈字名世與兄光承隱石筍里屏跡城市以終 王鴻緒明史

稟夏允彝列傳

陸慶曾字文孫一字子元素負才名居丙舍頗擅園亭之勝順治

丁酉以序貢入都中式事發遣戍遼左 尊鄉贅筆

陳爾振字永和又字子威諸生 見王澐贈詩

陳宗倫字秉生

常州府武進

劉憲章字端甫崇禎丁丑進士授中書科舍人考選御史巡城行

保甲法國威奸民悉屏跡疏數十上皆關人才得失民生利弊

其尤著者救劉宗周張瑋金光辰一疏巡按順天奏請免徵豆

料流寇熾張晝夜厲兵防禦又巡察三關荆襄一帶奔馳盡瘁

屢奉溫諭歸後臺使者欲登薦以病卻之 陽湖志

韓鍾勳字不挾崇禎辛未進士知湘潭縣 常州府志

陸自嶽字岱瞻崇禎辛未進士由歸善令擢司李進刑曹多平反



出知寧波府郡有巨猾充役吞噬無厭自獄廉得其人收捕之  
猾賄勢豪求免自獄曰僕為此方除害公反欲詒患桑梓乎卒  
置之法有賊胡乘瓏者倡亂雪竇剋日分犯自獄捕其內應者  
六人誅之隨發兵直抵賊巢獲其巨魁餘弗問當急變時自獄  
募疍嬴民兵六百人或曰兵期勇壯奚用是為自獄曰此饑饉  
餘生不急收之反助寇耳其深識如此丁憂歸尋卒 浙江通志

陳組綬字伯玉號伊菴崇禎甲戌進士授兵部主事旋改職方勤  
勞盡職以其暇著職方圖凡關軍機要害者悉載焉丙子典試  
山東事竣赴部籌兵畫餉倍於平時積勞成疾而卒著有五經

副墨孝苑編史諸書 常州府志

徐 法字式之順治十六年貢生 同上

徐 洽字浹之

王 章字漢臣號芳洲崇禎戊辰進士授諸暨令甫半載以才調  
鄞縣諸暨民與鄞民爭挽章至相譁洽鄞益有聲數注上考十  
一年行取為御史請罷內操屢陳江南旱饑請寬逋賦又劾內  
臣冒功詞甚侃直明年出按甘肅持風紀飭邊防所部十道監  
司劾罷其四居二年以母憂歸服闋還朝命巡視京營時李自  
成已陷山西警一日數至章按籍額軍十一萬有奇喜曰兵至  
十萬猶可為也及閱視半死者餘管伍億甚而司農缺餉章屢  
疏請發內帑不報踰月賊陷真定京師大震章與給事中光時



亨守阜成門三堞一卒三月初登陴閱十日始一還邸賊傳城下章手發二礮賊少却頃之四門礮聲絕時亨攝章走章厲聲曰惜死耶時亨曰訪上所在不獲則死未晚也從之與時亨並馬行俄賊突至疾呼下馬時亨降章持鞭不顧叱曰吾視軍御史也誰敢犯賊刺章股墮章罵曰逆賊勤王兵且至我死爾輩滅不旋踵矣賊怒攢槊刺殺章抵暮家人覓屍猶一手據地坐張口怒目勃勃如叱賊狀妻妾在籍聞之一慟而卒福王時贈大理寺卿諡忠烈 本朝 賜諡節愍次子之棡仕閩為職方主事亦死難 明史列傳

鄒嘉穀字元潤一字庭若崇禎癸酉舉人生而孝友篤嗜古學兄

嘉生舉進士授官嘉穀竭力事兩親撫幼弟如己子鄉黨稱之丁丑中會試副車有勸之就選者弗聽曰吾親老不以三公易一日也及居憂哀毀而卒選有清異錄行世 武進志

張龍文字掌霖諸生為人倜儻有奇氣作文高古句不猶人甲申死於難 同上

周 午字仲然順治六年貢生 常州府志

陳震生字青雷組綬子崇禎癸未進士官贛縣知縣 同上

鄒民穀

吳方思字方之號蓼堪崇禎庚辰進士官戶部員外郎 同上

秦德滋字以巽無錫人崇禎癸酉副貢生工詩與華淑黃傳祖輩



結涯臻詩社尤善楷法似歐陽率更嘗彙刻前人各種書曰梁溪秦氏帖甚精妙

無錫金匱志

鄭珏

陳咨稷字子育偏沅巡撫睿謨子崇禎壬午舉人端慤長厚積學

能詩歷官刑部郎中恤刑畿輔活死囚無數後陞雲南瀾滄兵

備有慎刑箴梅花草堂詩

常州府志

許遂字仁伯

憚本初字道生號香山諸生以例貢國子監居京師三十年不遇

甲申舉賢良方正除內閣中書棄官歸更名向工山水學董巨

二家法有畫旨四卷

大雲山房集畫徵錄

劉曉字旭來崇禎己卯舉人知慶都縣

武進志

憚鵬士字古鳳

江南春字掌垣

蔣演生字寅伯

譚志字中孚順治九年貢生由丹徒教諭陞曲江縣知縣

同上

鄭邴字順治十五年貢生

常州府志

江南秀字令則順治某年貢生任豐縣訓導

武進志

張祖吳字伯郡

許之漸字儀吉號青嶼巡撫鼎臣子順治辛卯舉人乙未進士任

戶部主事考授監察御史稱敢言其救科臣楊雍建參革義王



孫可望懲莊頭劉七皆著風采旋巡視陝西茶馬歸

江南通志

曹司文字在茲

龔九疇字禹錫參政三益子崇禎癸未進士博學有文名官中書

舍人卒有匡壁齋遺藁

武進志

趙梅鼎字調玉公安令繼鼎兄諸生

庚辰會試履歷冊

王之佐字尚卿號繭菴諸生嘗上書慷慨言國事將用之會闖逆

陷京師未果逆遁

入檢奏疏得其書大異之授懷安通

判尋改補嚴州府倅清介自守困同寒士善斷疑獄剖燭若神

人以為孝肅再見云

陸次雲撰傳

趙燭遠字晉引

馮斐道字成簡博極羣書教授生徒甚眾初聘曹氏女後女目瞽  
議離婚斐道怫然曰吾聘之猶以瞽棄之後豈有娶之者耶竟

迎歸相敬如賓生三子一女

陽湖志

無錫

馬世奇字君常號素修祖濂進士桂林知府父希尹貢生平樂教  
授世奇嗜學有文名舉崇禎辛未進士改庶吉士授編修座主  
周延儒世奇同郡也當國世奇務引大義非公事不以告十一  
年帝以頻歲用兵海內勞苦遣詞臣分諭諸藩世奇使山東湖  
廣江西諸王府所至却餽遺還進左諭德父憂歸服除會延儒  
再相世奇遠權勢不入都及還朝進左庶子則延儒已賜死親



暱者率避去世奇力經紀其喪時寇警日聞帝數召廷臣問計  
世奇言弭亂以人心為本闖獻二賊除獻易除闖難獻專刑戮  
人所畏闖佯不殺人所附也今欲收人心在敕督撫鎮將嚴束  
伍部令兵不虐民人心親附賊勢乃孤帝稱善為下詔申飭已  
賊薄都城世奇太息泣下曰事已不可為吾死而已城陷世奇  
方早食投箸起問帝安在或言已出城明日知帝崩東宮二王  
被執曰吾得死所矣其僕曰如太夫人何世奇曰正恐辱太夫  
人耳作書別母肅衣冠捧所署司經局印望闕拜曰臣不能報  
國一死謝陛下將自經二妾朱李盛飾前世奇訝曰若以我死  
將辭我耶對曰主人盡節我二人拜辭從死耳拜訖並先縊死

世奇乃自縊福王時贈禮部右侍郎諡文忠 本朝 賜諡文  
肅世奇砥礪名節居館閣最有聲好推引後進不妄取與居父  
憂時蘇州推官倪長珩其門人也以贖鍰三千金助喪辭曰蘇  
大饑留此賑民可也長珩以三百金犒從者立送所司為鄉邑  
修學費其疏財樂義如此 王鴻緒明史彙列傳

馬世名字君闇與兄世奇有平原二龍之譽中天啓辛酉舉人修  
文廟賑饑荒築北塘四十里建西定橋崇禎中以薦辟授知州  
不赴甲申世奇殉難信至獨奉母避地調護孤姪年八十五無

疾終 常州府志

黃家舒字漢臣諸生馬世奇門人自少稱高才生與孫源文善甲



申源文殉節家舒遂棄諸生服坐臥斗室謝絕交游修淨業自名其集曰焉文堂集 無錫金匱志

吳維藩字道勝

黃鍾亮字彥寅

華廷賓字嘉仲

呂陽字瞻望崇禎庚辰進士官湖廣僉事 常州府志

張德滋

黃元瑞

華時亨字仲通太學生受學於高攀龍時緹騎赴吳逮周順昌父珍聘遣時亨先以告攀龍攀龍遂赴水死巡撫毛一鷺究漏洩

者將殺之以媚璫時亨匿而免戊寅病失明申酉閒忌者摘其詩篇犯諱語逮繫吳門久之乃釋戊子復繫毘陵終以盲故得免有三禮正宗四傳異同春秋法鑿錄春秋敘說 陳濟生撰傳

周如璽字鴻章

馬瑞字爾采世名子才華富贍稱其門風中崇禎癸未進士除吉水知縣不赴改應天府教授遷國子博士福王時馬士英以同姓招致之拒不報 無錫金匱志

王孫蕙字晦季崇禎甲戌進士歷任歸善濬縣知縣考陞吏部 常州府志

王孫芝字房孟



秦 鏞字洪甫又字大音崇禎丁丑進士令清江五年凡所釐舉  
務求實惠己卯分校所得士皆知名江南初建擢監察御史屢  
上封事不報尋歸蕭然木榻絕不通人父爾載師事高攀龍鏞  
承家教研極性命之理著有易序圖說周子通書半解皇極內  
篇小衍參同閣集奏疏講錄諸書 無錫金匱志

王玉汝字人玉一字元琳崇禎己卯副貢生 同上

王孫蘭字晚仲崇禎辛未進士授刑部主事進員外郎遷成都知  
府父憂服闋起官紹興大修荒政遷廣東副使分巡南雄韶州  
二府及廣州之連州清遠駐韶州甫蒞任連州猺賊為亂孫蘭  
馳勦三戰皆捷猺遂降十六年張獻忠大亂湖南湖南之郴州

宜章與韶接壤孫蘭乞援於督府不應最後以七百人至一宿  
復調去及賊陷長沙衡州大肆屠戮韶所轄樂昌乳原仁化道  
竄一空連州守將先據城叛韶城士民間之空城逃孫蘭仰天  
歎曰失封疆當死賊陷城又當死吾盍先死乎遂自縊賊竟不  
至朝廷憫其忠予贈卹 國朝乾隆四十一年 賜諡節愍 殉  
節錄王鴻緒明史彙列傳

許王儼字孝酌

華廷獻字修伯天啓丁卯舉人崇禎庚辰賜特用出身官修武縣

知縣 常州府志

王延禧字錫卿順治七年貢生任句容訓導 同上



唐德亮字采臣少有才思以制舉業開闢風氣中崇禎壬午舉人

國朝順治壬辰成進士官戶部主事管京糧廳歷員外郎以

勤卒於官有四柳亭書巢諸集 江南通志

高 廣字遠度崇禎元年貢生 常州府志

秦楠

吳維蕃字岳立

許梅字用調

華赤字金兢

江陰

黃毓祺字介子天啓元年恩貢生好學有盛名精釋氏學乙酉秋

江陰城守不下毓祺起兵行塘應之城陷亡命淮南以官印印

所往來書爲人告變逮繫金陵獄門人常熟鄧大臨職納橐篋

獄急毓祺以所著小游仙詩及園中草授大臨坐脫而去當事

戮其屍大臨贖其首棺殮送歸 國朝乾隆四十一年 詔入

忠義祠 殉節錄明史侯峒曾列傳黃宗羲鄧大臨墓表

徐時進字元修有啜墨亭集 虎溪山房書目

徐遵湯字仲昭崇禎元年恩貢生少以詩謁錫山鄒彥吉延譽知

名黃道周亦與之游晚益貧鬻文爲業所居名小盤谷 常州府志

袁珍字元聲



吳幼學字敏仲

鄧林楨字克生

沈鼎科字鉉臣崇禎辛未進士令建陽初至庫有贏餘千金吏曰此備用公費鼎科悉以補窮民逋稅內召行攀轅者塞道官兵部主事後城陷自縊 忠烈紀實常州府志

夏寶忠字孝琛父樹芳以諸生教授里中所造就皆名碩按部至者必折節式廬侍御祁彪佳劉興秀給諫吳永順並薦於朝請如聘陳獻章吳與弼故事寶忠授文華殿中書性好施周恤貧族歲時不廢 常州府志

黃大湛字

毓祺子毓祺避江北時大湛與弟大洪俱逮繫毓

祺死輸入官配功臣家鄧大臨與鄉人斂金贖之後大湛改名晞教授毘陵有學行不愧其父 明史侯峒曾列傳南疆逸史

黃大洪字

毓祺子 事見前

宜興

徐懋賢字位甫天啓七年選貢生官戶部司務有手輯忠貞軼紀載甲申京師殉節之士足為一時實錄 常州府志寄園寄所寄

許啓洪字任宇天啓甲子舉人崇禎時知遂昌縣襟懷磊落才智過人值攢造編里聽民自相朋便又以府差擾害申請府廳各撥縣役聽差村落由是不擾 江南通志

徐懋曙字復生崇禎辛未進士官吉安府知府 常州府志



周正儒字 崇禎庚辰進士官禮科給事中 同上

陳貞慧字定生左都御史于廷子以廩例官生中崇禎庚午副榜少用文學著聞結納東南名士最善金壇周鑣貴池吳應箕會阮大鍼久被錮陰輦金於京師謀復用諸名士聞之數大鍼罪惡為文檄之共推應箕屬草而貞慧與鑣皆列名大鍼愧且恚曰吾不識陳某何如乃魚肉吾至此福王立大鍼驟起將盡殺東林黨人是時于廷已前沒而貞慧鑣應箕皆在南京鑣先被逮貞慧為營救大鍼謂知夜半遣校尉捕貞慧與應箕應箕亡貞慧出詣獄鍛鍊久之獄不成始釋貞慧而竟致鑣於死貞慧歸屏居村舍十二年卒年五十三有雪岑集山陽錄秋園雜佩

諸書長子維崧 國朝康熙己未以諸生應試博學鴻儒官檢討 汪琬陳處士墓表

周奕封字茹公延儒子崇禎壬午舉人 國朝順治壬辰進士選庶吉士 常州府志

吳繼文字西仍天啓六年恩貢生官通判 同上

萬謙 路之陞字子臨崇禎十二年貢生官慶遠推官 同上

鎮江府

周銓字簡臣金壇人少負雋才與弟鍾齊名崇禎丁丑中進士知上虞縣用古循吏法治之易良樸直多有政聲後謫代州判



官著述不倦有未焚集史論數十卷行世金壇破死之金壇志  
社事本末

王重字有三金壇人崇禎辛未進士授中書舍人考選吏部主  
事歷文選司郎中金壇志

賀王醇字魯縫丹陽人諸生與從父裳從弟儒珍稱鶴溪三鳳有  
續名臣言行錄續憲章錄丹陽志

于繼藩字翰明

賀儒瑜字美斯

譚兆隆字伯棟丹徒人崇禎某年恩貢生官南國子監博士丹徒志

丹徒

潘一桂字無隱一字木公吳江人父以賈僑居京口一桂少機警

過目成誦頗自負不肯專心諷誦父怒命之揚州賈一桂乃更

讀書為歌詩詩成輒書屋壁閒湖州沈聖岐以宦游道揚州見

壁閒詩大驚勸歸就學年十六補諸生念賦學衰廢思一振厲

之乃杜門研思作東征昌言諸賦閱博奇詭為時所稱年二十

餘返故里崇禎五年唐世孫好詞賦延四方賓客以書幣招之

再三辭家人怪之一桂歎曰極知世孫嚮我然國法不得與藩

邸交我何敢為亂首耶後游襄陽世孫已立為王遣使迎候一

桂不得已命駕往居一月稱疾辭歸期年王廢同時在國中者



後亦如日傳明 卷三  
皆株累坐法一桂獨以見幾得免卒年四十五有中清堂文集  
六卷行世古韻通考二十卷 松陵文獻

錢邦芑字開少諸生好談兵日求天下奇士結納之閩中建國以  
言事稱旨授兵部司務歷官御史晚爲僧著書衡山自號大錯  
丹徒志南疆逸史

劉孟震字起東一字長公學者卽所居稱曰鬯齋先生乳哺時好  
伏几觀書奪之卽啼四歲入塾授以句讀則喜端坐竟日五歲  
經書嫻熟九歲應童子試又三年文益奇古丁外艱撫棺哭之  
慟兩耳遂嘈嘈作聲不辨五音服除補諸生母沒遂絕意仕進  
甲申人皆奔南都孟震歎曰國事不可知而蠅營狗苟吾不知

所終也遂浪游齊魯吳越閩楚閒著書數十種尤篤嗜圖學行  
笈必攜丁酉講易維揚從游甚衆歸里以布衣終 兩朝遺詩傳

陳謙陽字吉之

張美中字孟文崇禎某年選貢生任潯州府推官 丹徒志

孫時傑字季少

郭繼曾字二魯

殷宜中字義卿崇禎甲戌進士官兵部主事 同上

徐學古字信之貢生 同上

吳觀宸

吳拱宸字襄宗崇禎丙子舉人 同上



金壇

周 鍾字介生敏穎絕倫負逸才角卯時詩文灑灑有萬言倚馬  
之目張溥舉進士歸悉以選政委之鍾鍾所出名山業一選膾  
炙人口崇禎癸未成進士選庶吉士甲申闖賊陷京師鍾出降  
用為檢討賊敗南歸明年四月治從賊罪鍾棄市 社事本末南

疆逸史

張明弼字公亮崇禎丁丑進士令揭陽多異政作三不便四大患  
議署杭州推官監軍平許都之亂甲申陞台州推官踰年陞戶  
部陝西司主事憤馬阮當國不赴性純孝割產以贍同姓厯官  
十年猶儻屋而居有螢芝集二十卷兎角詮十卷 鎮江府志

劉 蘇字玉立順治某年貢生任和州學正 金壇志

周 鎔字我容鍾弟 復社紀略

馮 篁字我最

王士鏢字元治號勉齋崇禎辛未進士知桐鄉縣御民以慈待士  
以禮悉蠲文網而吏不敢為奸五年內召擢戶科給事中即劾  
輔臣誤國改兵科極論邊事悉中機宜平生廉慎無餘蓄自祖  
父授田外未增寸土晚年兀坐一室人罕得見其面 金壇志

周 鉉字遠侯順治某年貢生任建德訓導 同上

史宏謨字文若順治戊子舉人已丑進士知臨安縣 同上

高 遇字冬侯崇禎丙子舉人 國朝順治五年任上海教諭陞



復而如且傳明卷三  
韶州推官 上海志  
劉國欽字敘生崇禎己卯舉人

國朝順治己丑進士授戶部主事  
歷員外郎中陞惠州府知府 金壇志

蔣煥字闇然

周而衍字東會

周金字伯玉崇禎某年選貢生 同上

蔣鳴玉字楚珍崇禎丁丑進士為台州司理七年甫行取值福王

南渡是秋為兵科給事中 王師入江寧棄官歸久之洪承疇

薦參湖南軍事順治三年錄從征功擢山東按察司僉事分巡

兗東道不數月即請歸養不許適坐屬縣累當候調遂致仕有

怡曝堂集 汪琬撰碑文

楊良弼字巖公崇禎庚午舉人授監紀推官 金壇志

王錫蘭字紉佩

史麟孫

馮堂字民瞻

張琪旭

于琚字居玉

張化字鱗聖

武際飛字九羽改名鼎升崇禎庚午舉人庚辰欽賜進士官新昌

縣知縣 同上



江 潢字度生崇禎癸未進士任杭州推官 同上

張大心字天放明弼子順治某年貢生歷任望江如臯訓導有桂  
杙自詠續唾霧等集 同上

張遠心字無巖明弼子諸生有西園翰霧等集 同上

丹陽

荆 良字石兄崇禎某年貢生知京山縣 丹陽志

荆廷實字實君崇禎癸未進士官兵部武庫主事典領樞要望重  
一時召對楓宸多所碩畫疾作歸嗜學著書選有歷朝傳文舉

要分初盛近三集行世 同上

荆廷璧字君佩

荆康肩字燕生

賀儒修原名儒珍字悟希崇禎辛未進士知成都縣 同上

賀燕徵字元生

盛 順字順伯

荆澍明字雨若

荆洞明字靜生

賀 裳字黃公少以諸生入太學年三十不知爲古文詞見有爲  
駢語乃始自愧因發所藏書讀之畏聞戶外聲至以絮塞其耳

十年博極羣書有載酒園詩話史折少賤齋集 同上

荆 湘字湘芷



賀在位字孫睿

馬安陽

潘 陸字江如吳江人一桂子諸生遭亂棄儒冠轉客江湖閒僑  
居鎮江時往來故土與邑人俞南史朱鶴齡顧樵茂倫輩相倡  
和有穆溪集其論詩慷慨謂鍾譚興而國亡是亦法家定案明  
詩綜遂初堂集

賀 銓字子展

賀 璘字瑞如康熙某年貢生丹陽志

賀 琯字獻虞

賀 黃字公期

賀 達

荆衍穀字爾戩康熙癸卯舉人同上

馬宇陽字夢白

賀敷治字堯臣

吳來紱字素兮

荆 笈字選容



復社姓氏傳略卷三終



